

東
華
續
錄

東華續錄

咸豐二十七年

臣王先謙敬編

臣陶濬宣恭校

九月癸卯朔勝保奏臣因逆賊覲覲北路將山西調到兵一千餘名扼要布置一面督兵前進當賊未東竄時卽飛催恩華托明阿等由潞澤一帶迎擊會剿扼其東竄旋經托明阿咨稱已由澤州前進而恩華行抵何處未據覆到臣卽督兵由子洪口南關前進欲與托明阿聲勢相聯詎該逆聞我兵將至乘閒向東奔竄托明阿在長子縣屬之鮑店遇賊接仗擊退數里旋復奔突東竄由屯留縣城外竄至潞城黎城一帶潞城失守卽已收復托明阿帶兵尾追西凌阿亦跟蹤前進臣本擬將該逆困於沁源山中全賴東南之兵截住庶可四面齊進一鼓殲除無如賊奔太急各路進兵

較緩臣由垣曲至洪洞路經千餘里追剿半月有餘使恩華所帶馬步隊與托明阿相合必可得力乃緩不濟急董占元亦至今未到訥爾經額此時恐亦未趕到正定臣若再尾追更恐不及見已由南關折回太谷帶兵二千餘名直趨正定獲鹿井陘一帶以扼北竄賊鋒保衛畿輔並飛調舒興阿派來之副都統綿洵前任總兵桂齡帶領官兵一千八百名並副將孔廣順所帶官兵九百名隨同剿辦復於臣所帶馬隊二百餘名內撥出一百五十名派營總巴揚阿由北路迎頭鈔擊一面飛咨直隸督臣山東撫臣嚴防以便跟蹤夾擊一面飛催恩華迅速由清化前進保護彰衛一帶更請飭下於保定南北添兵嚴密布置庶期有備無患至恩華托明阿一則會剿遷延一則堵禦未善應請旨交部分別議處臣督催不力以致徵調未齊請旨一併交部議處訥爾經額奏探得西

竄餘逆分股擾及晉省潞澤並由潞澤竄至豫省涉縣武安縣復由武安山路徑奔臨洺關查調駐臨洺之吉林兵一千名因豫省車輛不敷周轉已到防者七百五十名且軍火器械尙未運齊當又截畱折回之山西兵三百名飭令總兵經文岱統帶迎擊該逆拚死抵拒我兵奮力轟擊斃賊百數十人並斬獲紅巾賊目首級一顆生擒長髮賊匪一名該逆稍退我兵續有斬殺無如山徑可通之路不一而足且該逆到處裹脅愈聚愈多我兵不滿千名寡不敵眾致有傷亡臣見在暫駐廣平府城催調官兵並擬卽日帶兵由南和冀州無極一帶繞道鈔出賊前馳赴正定堵剿一面飛咨署提臣保恆由固關帶兵迎剿至臣子蘊秀偕同副將伊綿阿等前在清化帶兵一千名由澤州小路取道前赴平定井陘一帶駐防此時署提臣帶兵迎擊則固關空虛見已飛飭蘊秀等卽在

固關駐紮堵禦並飛咨桂良嚴防省會請將見在南苑之察哈爾兵四千名調赴正定堵剿其見駐天津之盛京兵二千名調駐保定防堵桂良奏臨洺關被賊竄踞見探賊已北來距順德城不過二十里據訥爾經額咨請添兵堵截前來查省城官兵僅有四百餘名滿營駐防官兵亦止五百餘名均無可撥況臨洺關距省不過六百餘里畿輔重地爲都城保障亟宜準備斷難分兵前往惟查由省撤回之大同後起官兵五百名尙未出關見在速飭改道徑赴順德迎剿並將龍王廟水次停泊之盛京吉林官兵飛咨該督就近飭調並飛咨勝保迅速帶兵來直跟蹤剿辦一面知照慶祺將駐紮天津之盛京兵分撥一千來省但恐行走較遲應懇天恩先行撥給京營精兵五六千名隨帶礮位迅速前來一面保衛省垣一面策應前路方可無虞惟省城礮位不敷防堵聞副都

統佟鑑管帶赴晉礮位已於二十九日由京啟程擬俟該副都統到省時幫同防堵並將所帶礮位暫行截畱以資急用 上諭內閣訥爾經額奏賊匪竄越直境催調官兵堵剿桂良奏臨洺關被賊竄擾勝保奏督兵星馳繞赴直隸截剿各一摺該逆自山西洪洞東竄復由屯畱竄至潞城黎城一帶經勝保善祿托明阿西凌阿等分路追截勝保已將賊匪北竄太原之路扼要堵截托明阿由澤潞進兵復於屯畱境內追及賊蹤亦獲勝仗將該匪擊退數里旋復奔突東竄而恩華赴晉迎剿之兵迄未與賊一遇以致該逆徑由涉縣武安竄入臨洺踞關抗拒畿輔重地豈容逆匪竄擾該督訥爾經額由臨洺退回暫駐廣平調集官兵親督進剿勝保等已統帶各路大兵繞出賊前截擊托明阿西凌阿等跟蹤追擊並有舒興阿派來之副都統綿洵總兵桂齡與副將孔廣順官兵

隨同勝保等擊賊見在本省防兵及盛京吉林官兵雲集已數剿辦著再添派培成多爾濟那木凱管帶駐紮南苑之察哈爾馬隊官兵卽日啟程並派慶祺維祿管帶駐紮天津之盛京官兵迅速馳往統計京外大兵數萬餘名併力奮剿諒此么麼小醜惡貫滿盈盡數殲除剋期可待前曾疊次諭令訥爾經額嚴防直隸各要隘據奏早經布置何以先期絕無偵探準備以致賊匪竄入直境該督調度乖方實難辭咎訥爾經額著革職畱任並拔去花翎以示薄懲恩華會剿遷延致賊東竄著革職畱任仍責令帶兵迅速繞出賊前會同勝保協力剿辦以贖前愆托明阿剿賊奮勇出力身受槍傷惟未能遏其竄逸著降五級畱任勝保督催不力咎亦難辭著降二級畱任均著迅速會剿殄此羣兇肅清畿甸如帶兵大員及鎮將以下各員弁再有逗畱不進致誤事機者卽著該大

臣懷遵前旨嚴參懲辦○諭軍機大臣等逆匪被剿竄入直隸訥爾經額以兵力不敷退至廣平致臨洺關被賊占踞業經該督暨桂良奏到披覽之餘殊深憤悶臨洺距直隸省城甚近若不及早殲除不但順德廣平被其滋擾卽近畿一帶亦爲震動勝保夙稱勇敢且畀以總統重任各路官兵均歸調度著卽迅由井陘一路出山迎截並飛催各路帶兵大員迅速會剿總期近畿地方及早肅清以慰廑念前據恩華奏報亦擬帶兵由固關一路迎截此時不知行抵何處是否已與勝保會合著卽速催前進會同剿辦毋再延誤托明阿槍傷想已痊愈卽著西凌阿等併力追擊使賊匪前後受敵無難悉數殲除董占元畏葸不前至今屢催未到實屬可惡著卽查明如係有心貽誤卽奏請正法以肅軍律見派理藩院侍郎培成護軍統領多爾濟那木凱帶察哈爾官兵三四千名

前往正定惟馬匹尙需調撥此項官兵恐未能剋期趕到其盛京兵二千名由天津馳赴保定如有應需調遣之處卽行咨調協剿恆春已令暫畱正定協同帶兵防剿並將副都統佟鑑所帶礮位截畱著卽酌量布置滹沱河渡口船隻亦須飭令收集毋令奸匪偷渡畿疆重地豈容逆匪滋擾該大臣惟當申明紀律嚴定賞罰與在事諸臣同心勦力迅殄妖氛以副委任將此由六百里加緊諭知勝保並諭令恩華托明阿善祿西凌阿等知之○諭訥爾經額桂良先後馳奏賊竄直境情形各摺自賊竄懷慶之時節次諭令該督嚴防畿輔要隘卽該督疊次奏報亦似各處皆有準備何以賊蹤竄及一戰卽潰且軍火器械爲兵丁衛身擊賊之具自賊匪西竄該督漫無布置竟置軍械於後致令如此勁旅徒手禦賊事後咎車輛不敷亦已無及卽此一節該督調度無方已可概見

逆匪已踞臨洺關且離順德不過二十餘里該督既在永年發摺何以並不提及臨洺關失守之事摺內又稱擬由南和冀州無極一帶繞出賊前廣平至正定自宜徑向北行何以轉折而東似此紆折遷延是何意見豈將任賊直奔正定乃由冀州一帶爲退回省城計耶保恆帶兵由固關出山迎擊自係正辦蘊秀伊綿阿何以轉令畱紮固關不與保恆合力剿賊勝保等見已由獲鹿井陘一帶督兵迎擊該督務卽迅速赴正定與勝保等會剿萬勿再有延誤致干重罪滹沱河見當盛漲有險可守並著飭令地方官收集渡船毋爲賊用所有派赴正定之察哈爾官兵卽日由京啟程該督不可專待此項兵丁致有貽誤其派赴保定之盛京官兵卽著與桂良妥商布置並嚴飭地方文武合力守禦儻再有疏失惟該督是問逆匪雖肆意奔突而前後均無應援若截剿得手難保

不由磁州一帶回竄豫境懷慶府知府余炳燾前已有旨補授陝西鳳邠道令赴新任該員熟習河北情形著該督卽飭令暫畱懷慶會同河北鎮道籌辦防堵其山東與直隸交界處所亦卽飛咨瑞昌崇恩一體嚴防以杜竄逸將此由六百里加緊諭令知之○諭見在勝保督兵由固關一路出山直趨正定截剿不日卽可馳抵該處恆春著卽暫駐正定府督率該處防兵相機布置俟勝保到後再行奏明赴晉據桂良奏見畱副都統佟鑑協同防守省城並截畱礮位著該撫體察情形如須將礮位運至正定以備攻剿卽行知照桂良妥速辦理將此由六百里加緊諭令知之○撥山西司庫銀三十萬兩鹽庫銀五萬兩捐輸銀十萬兩陝西捐輸銀二十五萬兩解京備餉○調熱河馬三千匹察哈爾馬二千匹來京備用○甲辰諭內閣宗人府八旗都統奏遵議紅白賞卹分別

酌辦各一摺著照所議所有宗人覺羅見任食俸官員本身紅白
事暨閒散宗室覺羅紅事賞卹銀並八旗官員紅白事及兵丁紅
白事賞卹銀均暫行停止其閒散宗室覺羅白事卹銀暫停一半
至八旗兵丁白事卹銀仍照舊賞給一俟庫款稍充再行查照舊
章辦理○諭軍機大臣等給事中雷維翰奏州縣浮收激變多以
抗糧滋事爲詞請旨飭各督撫妥辦一摺國家征收賦稅各有定
額豈容不肖貪吏於正供之外任意勒折浮收激變以致民力告
匱民欠日多中飽在吏胥而虧損在於國課若如該給事中所奏
州縣收漕竟有應交一石浮收至兩石之多並有運米不收勒折
交銀以致民怨沸騰激成事變遂有聚眾戕官之案不得不發兵
剿捕而各州縣反藉詞於抗糧滋事以掩其浮勒之咎究其起釁
根由皆此不肖官吏貪婪所致見在東南財賦之區並半遭蹂躪

業經屢沛恩施分別蠲緩其未經被兵州縣仍當照舊輸將以充國課若再任貪吏朘削以致民不聊生逋欠纍纍强者抗拒弱者流亡其何以蘇民困而裕倉儲著有漕各督撫於州縣征漕之際畱心察訪如有浮收勒折激成事變反借抗糧爲名希圖蒙蔽者卽將該員嚴參治罪並卽遴選賢員接辦妥爲安撫綏靖地方務當實力奉行勿負諄諄誥誡之意原摺鈔給閱看將此各諭令知之○諭寄諭署山西巡撫郭夢齡惠親王等奏請飭晉省籌畫軍需一摺山西素稱富足軍興以來紳士商民人等急公好義踴躍輸將數已不少自逆氛擾入晉境平潞各府屬慘遭蹂躪眷懷西顧時深憫惻見在賊蹤他竄省垣一帶幸得保全惟搜捕餘匪防守要隘善後事宜均關緊要當此庫藏支絀之時一切經費不能不兼資民力以期其濟著該署撫遴選賢員會同公正紳耆推誠

布公剴切曉諭各就地方情形妥速辦理自有實效原摺鈔給閱
看將此由六百里諭令知之○諭寄諭欽差大臣琦善向榮兩江
總督怡良署江蘇巡撫許乃釗安徽巡撫李嘉端查文經奏統籌
江南大局酌擬四條呈覽一摺所奏甚是其速募戰艦一條尤爲
肅清江面要著前經疊諭湖北湖南各督撫趕緊製造嗣經該省
奏稱民船不適於用業已收買江船照廣東船式改造可安礮位
而利遄行著卽迅催張亮基等派委得力員弁雇募舵丁水手駛
赴江南以資攻剿廣東所募紅單船早抵閩洋此時當可入口又
有知縣林得泉所願挖置船見泊上海均著飛催前進萬勿刻遲
至逆匪於江岸徧設礮臺以致我兵船不能前進故自艇船入江
以來雖屢次接仗未聞越北固金山而上至黃天蕩者該臬司所
請攻奪五龍山北固山象山沙州圩等處礮臺並扼守東西梁山

爲安排水戰之急務尤宜急早圖維先奪賊臺而後艇船得以暢行無阻其區別練勇一條亦切中募勇情弊著該大臣督撫等體察情形迅速籌辦庶不至坐耗時日糜餉老師也原摺著鈔給閱看將此由六百里各諭令知之○調察哈爾兵二千名赴直隸剿賊○乙巳諭內閣理藩院奏請暫停年班來京一摺內扎薩克蒙古王公等自軍興以來或捐輸經費或呈進馬匹均屬急公報效本年年班若仍令其照常入貢費用浩繁恐增苦累所有本年內外扎薩克蒙古王公台吉額駙年班均著暫行停止一年其回子伯克及後藏堪布如已啟程無論行抵何處卽著折回無庸來京以示體恤○諭軍機大臣等寄諭兩廣總督葉名琛廣東巡撫柏貴有人奏廣東濱海之區沙田數千萬頃多未升科皆由辦理詳咨費用太多人皆畏縮若減價征收計可得銀數百萬兩又據奏

稱粵東紅單船與官兵不相洽習至臨陣機宜令自舉勇幹紳士爲之董率又有快蟹船與紅單船相輔可一併招募若能轟燬賊船卽將銀物全行賞給等語見在經費支絀如果沙田多未升科該督撫等卽體察情形妥爲籌辦前募之紅單船早已馳抵閩洋其快蟹船隻亦經諭令雇備該督撫等諒已遵旨辦理著卽派委明幹賢員將前項船隻擇其船堅礮利者再行設法雇募多隻並派勇幹紳士令其管帶迅赴金陵會同協剿如能將江面賊船全行轟燬卽賞以數十萬金亦所不吝該督撫等卽酌量妥速辦理毋稍延緩原摺著鈔給閱看將此由六百里諭令知之○命京營總兵達洪阿帶八旗兵赴直隸賞銀有差○丙午諭內閣前因逆匪竄入山西訥爾經額折回直隸疊次諭令將各路要隘嚴密防守乃賊匪竟由山口竄入直隸境內占踞臨洺關該督退至廣平

自前次奏報後數日以來並無續報本日據尙書桂良奏賊匪擾及隆平柏鄉等縣正定郡城喫緊催調官兵堵截等語不知該督所司何事見在行抵何處殊堪詫異該督久任畿疆一遇軍務漫無布置孤恩溺職咎實難辭訥爾經額著卽革職仍畱於直隸隨同桂良辦理防剿事宜直隸總督著桂良補授務卽悉心籌畫與勝保等調派將弁兵勇迅速截剿盡殄賊氛以副委任○諭軍機大臣等寄諭直隸總督桂良逆匪竄入臨洺關復陷隆平柏鄉勢甚剽疾正定情形極爲喫重慶祺等所帶駐紮天津之盛京兵二千名已於初三日由水路啟程前赴保定其察哈爾官兵並派出京兵亦卽日前往協剿所有撤回之大同兵及龍王廟停泊之盛京官兵並吉林官兵均須飛催趕到佟鑑所帶礮位如已到省著查看緩急與恆春酌量布置隨時知照勝保合力勦辦前調大凌

河哲里木錫林郭勒等處馬匹聞已入山海關卽行飛催前進勿
令稽延該督身任畿疆責無旁貸惟當統籌全局迅殄賊氛以慰
天望○將此由六百里加緊諭令知之○張芾奏粵逆攻撲省城九
十餘日臣等委員會同紳士將倡議餽賊及乘機搶掠之土匪次
第拏獲正法連日飭將二三千斤大礮十餘位分布章江得勝二
門緊對賊壘晝夜轟擊擊沈賊船二三十隻獲犯供稱連日礮斃
賊匪二三百人該逆難以棲身似有遁意八月二十一二等日臣
等派令各營兵勇分路攻撲賊營該逆仍伏匿不出槍礮如雨我
軍撲近牆根拋擲火彈火罐每日燒斃賊匪約數十人二十二日
夜賊營槍礮猶向城內轟擊我兵齊放大礮賊礮頓止兵勇乘勢
下城放火時值南風大作延燒甚熾賊眾紛紛上船揚帆下竄燒
斃溺斃之賊不計其數生擒八十餘名殺斃百餘名奪獲船十二

隻礮三尊擡槍十三桿我軍苦無舟楫不能順流尾追見已派令都司戴文蘭等帶兵兼程繞出賊前沿途截擊江忠源與總兵音德布等亦卽分起跟蹤前進如賊於出湖後上竄卽於九江一帶堵剿如賊仍回竄江南安徽仍咨各該督撫加意嚴防江西省城固守九十餘日仰賴 聖主福庇得以保此危城所有在事始終出力各員容 臣等查明具奏籲請恩施以昭激勸江忠源奏賊匪乘風下竄 臣應卽星夜跟蹤追剿奈江省自被賊擾近省民船非先行逃匿卽爲賊擄掠一時實難雇覓而賊一出湖口上可窺伺湖北下可竄擾安徽並可歸併金陵下游查無陸路可以繞赴賊前惟上游之九江府及田家鎮等處尙可從建昌一帶迎剿 臣等商派都司戴文蘭等帶辰州兵開化勇楚勇廣勇二千餘名卽日啟程從陸路趕至九江 臣一面確探賊蹤一面設法雇覓船隻帶

領雲南湖南官兵湘勇楚勇由水陸尾追如賊果上竄卽與戴文蘭等前後夾擊若該逆順流而下卽令戴文蘭等由九江雇船駛下與臣等合隊追入皖境探明賊蹤相機堵剿儻竟歸併金陵或仍遵前旨馳赴河南或徑赴金陵到皖時當可奉到諭旨再行欽遵妥辦李嘉端奏據前臬司張熙宇稟八月二十二夜聞至次日午間賊船六百餘隻陸續停泊安慶城外乘夜進城不許百姓逃避復至北門外各村莊搶擄人畜黃花亭馬山兩處皆築土城又於準提菴築土牆截斷大路北門城樓安置槍礮各城添築望樓城垣增高五尺匪眾約五六千人意圖占踞安慶若非厚集兵力迅速殲除恐將爲北竄之繼集賢關防守萬不可虛僅有前援廬江之練勇六百名可以派往救應恆興所帶陝兵五百名亦可撥往而廬郡已無一兵但恃鄉勇守禦前次琦善所撥慧成之兵除

宣化鎮兵五百業經

臣

商調協守東關其陝兵四百五十名亦擬

商調併交恆興管帶以資堵禦慧成卽帶青州馬隊千名駐守和州其關山一路咨商奕經由固鎮進守復咨商周天爵帶其派往潁州剿匪之兵來桐懷擇要進剿並咨尙書恩華將自皖帶去各兵仍帶來廬另派兵駐守徐宿刻下懷慶解圍餘賊剿洗殆盡且計江西賊船諒已去盡從前奉命防堵皖豫交界之江忠源自應仍遵前旨追剿來皖亦經臣咨明張芾查照飭遵並咨張亮基向榮速撥船礮令上下游並進知照陸路合力痛剿或不難於掃蕩見在惟當力守集賢關未敢輕言攻擊請飭下各路帶兵大臣速卽應援俾全皖危而復安則臣民幸甚上諭張芾江忠源奏逆匪敗竄省城解圍各摺片本日據李嘉端奏賊船六百餘隻停泊安慶府城外乘夜入城見在賊匪不下五六千人等語此股賊匪

顯係圍攻南昌不能得手復圖竄踞安慶本日已諭令李嘉端周天爵迅籌剿辦並諭令張亮基崇綸將造備船隻催赴下游交江忠源調遣其夏廷樾所造船隻並著派員押送下游以備兵勇乘坐見在南昌省城解圍所有被難居民著張芾等妥爲招撫其竄踞饒州擾及吉安等處土匪仍著督飭各員弁趕緊剿除江忠源跟蹤追剿總以肅清江北爲要著卽與都司戴文蘭李輔朝等督飭兵勇直赴皖省探明賊蹤合力攻擊勿令餘逆久踞皖城又成巢窟將此由六百里加緊各諭令知之○論本日據江忠源奏竄擾江西省城之賊疊受懲創於八月二十日乘風下竄見已跟蹤追剿惟水路船隻自被賊擾後一時實難雇覓又據李嘉端奏有賊船陸續停泊安慶占踞府城請飭亟爲應援各一摺是由江西擊退之賊非上竄湖北卽全數下擾安慶江忠源雖已跟蹤追剿

而苦無船隻恐剿辦未易得手張亮基等籌備船隻此時諒已辦有成效如尙辦不足數著將業經改造若干隻先行派委得力員弁管帶星速駛赴下游聽候江忠源調遣協同截剿毋得延誤將此由六百里加緊諭令知之○諭安慶賊船是否卽係由江西紛竄見在匪徒五六千人築壘沔濠已有占踞之勢必當早圖攻剿已命張芾將江西新造戰船由江赴皖以備調遣並命張亮基等將備赴江南船礮先行酌撥駛往安慶以爲援應該撫務卽嚴飭玉山張熙字等扼守集賢關防其北竄安徽見無重兵惟周天爵在潁州剿匪著迅撥兵勇由桐懷一路擇要進剿並可保護廬州仍飛咨江忠源無論水陸迅速赴援慧成前由揚州分撥青州官兵八百五十名派常清管帶馳赴和州計日趕到亦可酌量調撥奕經見守固鎮能否進守關山一路著李嘉端與奕經周天爵咨

商辦理將此由六百里加緊諭知周天爵李嘉端並諭壽春鎮總兵玉山知之○以江西賊匪擊退省城解圍開復巡撫張芾革職畱任處分賞在籍尙書陳孚恩花翎按察使江忠源二品頂帶○以江西安福泰和萬安等縣城被賊竄陷革知縣文明職與已革知縣郭春齡王家棣並逮問○丁未諭軍機大臣等桂良奏賊匪已至趙州該督飛札署提督保恆實力防守並飭正定總兵及該府知府於滹沱河渡口多派兵役晝夜把守船隻已收北岸復於沿河安設擡槍擡礮以防偷渡惟趙州逼近正定距省亦甚近若不趕緊截剿則近畿一帶俱爲震動該大臣由井陘出山迎截見在行抵何處連日未據奏報朕心實深焦灼所有培成多爾濟那木凱帶領京兵及察哈爾官兵並達洪阿帶領京兵均已催令啟程統歸該大臣調度著勝保卽督兵星速兼程前進繞出賊前痛

加勦洗正定爲省城門戶不可稍有疏虞恩華所帶之兵亦由井陘一路出山見抵何處亦未據奏報著卽飛催前進合力攻擊托明阿西凌阿等追賊是否跟蹤緊躡其後何以未聞接仗並著隨時知照前後夾擊所需糧餉已諭令郭夢齡源源接濟想該大臣定能奮勉圖功速滅此賊以副重任將此由六百里加緊諭令知之○諭桂良已授爲直隸總督本省各路防兵均可調遣所有訥爾經額管帶各官兵見在何處該督卽飛催調撥扼要堵截並嚴飭保恆實力防守正定該郡爲保定門戶萬不可令賊匪闖入務於滹沱河口派委得力大員督率弁兵不分晝夜竭力巡防該處船隻無多易於收藏淨盡惟須嚴查兩岸居民接濟賊匪竹木等物致令紮筏偷渡所畱省垣之佟鑑帶往礮位應否移駐該處交恆春保恆派撥應用著該督酌量妥辦本日已飛諭勝保兼程前

進計該大臣見在必可趕入直境杜賊北竄至省城地方尤屬緊要藩司張集馨見在駐紮何處何以賊由河南竄入直境未見該司督兵堵截省城藩臬皆係署任張集馨豈置之空閒之地著該督查明飭令該司星馳回省協同辦理防剿至河閒府一帶亦係通衢著該督一併飭屬設防並通飭所屬曉諭紳民認真團練互相保衛以靖地方將此由六百里加緊諭令知之○諭天津密邇京師濱海要地不可不嚴加防備聞該處團練頗有成效著文謙會同該鎮道認真督勸實力操演以資捍衛並飭在籍前任巡撫梁寶常督率倡辦至海口商民船隻亦須隨時嚴密稽察毋令奸細溷迹其陸路商販難民亦難保無匪徒假扮希圖窺伺虛實著文謙等密派妥幹之員隨處訪查儻有形迹可疑者卽行嚴拏究辦惟須持以鎮靜切勿張皇將此由六百里諭令知之○諭據怡

良奏收復三縣城池一摺逆首周立春恃刁逞惡膽敢糾匪踞城見經委員丁國恩等帶兵勇攻破嘉定城門立將該逆擒獲其寶山青浦二縣亦經都司景又春主事劉存厚等分馳攻剿先後收復縣城辦理尙爲迅速所有接捕餘匪撫綏良民各事宜卽責成地方官並各該員弁妥爲籌辦該逆周立春押解到省訊明後卽行盡法懲治以儆兇頑南匯川沙上海三廳縣見在尙未克復前據許乃釗奏親督大營官兵前往剿辦著卽兼程馳赴該處督同署臬司吉爾杭阿帶兵進剿以期迅速殲除勿畱餘孽至上海華夷雜處且爲海運總匯之地關繫尤屬緊要必須及早攻克以靖人心該道吳健彰本有失守城池之罪惟於地方情形素爲熟悉著該督等卽飭該道督同地方文武相機克復以贖前愆將此由六百里諭令知之○奕湘以病免調麟魁爲禮部尙書以花沙納

爲工部尙書聯順爲左都御史穆蔭爲禮部左侍郎

由內閣學士遷

○調

阿靈阿爲兵部尙書以德興爲刑部尙書載齡爲工部左侍郎

由左

副都御史遷

○調瑞麟爲戶部右侍郎青麇爲禮部右侍郎○賞察哈

爾出征官兵羊隻○戊申諭軍機大臣等昨據勝保奏報初三日

已到平定州計程日內可抵正定惟逆賊行蹤趨急見已擾及趙

州我軍果能繞出賊前迎剿當不至任其北竄該大臣所稱探聞

賊由順德東竄之說不知確否已諭長蘆鹽政文謙督同天津鎮

道實力巡防慶祺統帶盛京官兵二千名已由天津水路啟程其

原坐船隻亦令於到省後暫畱停泊儻天津有警即可折回截剿

其由東而北河閒一路由西而北易州一路均須密爲布置此時

兵力斷不能處處設防昨所派出之八旗精兵及京營兵二千五

百名察哈爾兵二千名並慶祺所帶盛京官兵剋日均赴保定會

齊保定扼東西之衝兩面皆可兼顧該大臣探明賊蹤所向應調往何路飛速調撥或前進迎擊或東西兩路堵截並迅卽知照桂良一體籌辦該大臣等帶兵或遏賊前或躡賊後總須前後夾擊定當盡殲醜類見在恩華所帶之兵行抵何處未見奏報該大臣卽嚴催前進如恩華不能親督迎剿其帶兵各員孰爲勇往卽著指名調取令其帶兵飛速前赴大營以備調遣兵機緊要不可遷就拘泥任令貽誤訥爾經額見奏續調到盛京兵及收集潰兵二千名交經文岱統帶跟追訥爾經額復同文冲帶後到兵一千名見在均在何處署提督保恆所帶兵五百名蘊秀伊綿阿畱紮固關兵一千名並前調赴保定之吉林兵一千名見在是否趕到並著該大臣迅速催調擇要調撥以資防剿仍確探賊情隨時奏報以慰廑念將此由六百里加緊諭令知之○諭天津爲畿東保衛

見值逆氛未靖一切防守關係緊要必須事權歸一方足以資彈壓長蘆鹽政文謙係朕特簡之員所有地方防堵事宜卽責成文謙會同鎮道大員妥爲籌辦並隨時督率文武員弁及紳民練勇等實力巡防總以嚴緝奸匪鎮定人心爲要又據勝保片奏天津街市立有火會凡遇救火之時鳴鑼立聚萬人若發給器械等件可以齊力殺賊等語此項人夫素多勇往如果控制得宜卽可與兵練相輔而行著該鹽政等體察情形飭屬團集務須曉以大義俾知互相守衛卽所以自保身家儼逆匪有東竄天津之信該鹽政等務卽相機布置勿稍疏虞勝保原片鈔給閱看將此由五百里傳諭文謙並傳諭特克慎張起鵬知之○諭據崇恩奏亟籌安輯災黎請截畱漕糧備賑一摺山東濟甯等州縣因今春豐工漫口旋堵旋塌秋汛來源甚旺該處復被淹浸數萬饑民深堪憫惻

著准其於東省本年應徵漕糧內截畱十五萬石以備賑濟之用
惟見在江省被兵浙省亦多被水災明年海運漕糧恐有短絀天
庾正供未便紛紛截畱該署撫仍當督率妥員覈實放賑如有餘
米可以節省仍著運京並曉諭官紳士民如有捐輸米石者亦可
補漕糧之不足此外能設法招徠更爲妥善該署撫務當籌及全
局不可徒爲一省計也將此由六百里諭令知之○諭楊以增奏
軍務未竣應行緩堵漫口一摺南河見當辦理防堵若興舉大工
誠恐數十萬夫麇集河干奸匪因而溷迹自應暫緩堵築以昭慎
重該河督務將漫口盤頭督飭廳營各員竭力裹住勿令續塌俟
來歲秋閒再行興辦至另奏請撥歲料銀一百二十萬兩已交戶
部議奏惟部庫支絀異常各路軍需尙有應接不暇之勢斷難如
數撥給見在豐北上游漫口下游工程自必稀少該河督必當撙

節覈計不可任聽屬員仍前浮濫並著剴切曉諭所屬無論河工
地方人員有能捐貲購料或分段承認歲料工程者卽行開單奏
請恩施庶幾於萬難措置之中力求補苴之術或於官紳商民中
剴切勸捐集貲濟急或酌量情形可以行用官銀錢票較爲便捷
並著該河督斟酌妥速籌辦毋誤要工將此由四百里諭令知之
○訥爾經額奏逆匪北竄派總兵經文岱帶兵追擊並會同文冲
督兵接續前進得旨眞可謂孤恩溺職之至汝久任畿疆所籌何
事經文岱未必眞能得力汝同文冲續帶之兵亦不過遠遠觀望
希飾前非朕若待汝奏到不知誤了多少緊要機宜○以福建廈
門剿匪出力賞已革提督李廷鈺二品頂帶命協同辦理同安廈
門剿匪事宜○賞京旗各營出征官兵銀兩有差○己酉諭內閣
軍機大臣會同刑部定擬楊文定罪名一摺已革江蘇巡撫楊文

定奉旨前往江甯省城辦理防堵乃因陸建瀛自九江退回輒以鎮江爲蘇省門戶遽行出省追賊竄至鎮江又不能嬰城固守以致失陷實屬罪無可逭楊文定著卽照祁寯藻等所擬按律定爲斬監候秋後處決○諭前因禮部奏福建舉人林昌彝呈進三禮通釋一書當交南書房翰林校閱尙多脫誤因將原書發交該舉人再行詳校茲據改正仍由禮部呈進著卽賞收該舉人林昌彝畱心經訓徵引詳明著以教授歸部選用以示獎勵○諭賈楨等奏豫籌城守請令各舉京員協辦團練一摺京城內外前已派王大臣等辦理巡防並令五城清查保甲見復諭令吏部揀選道府州縣及佐貳佐雜人員發往順天府五城分別差委果能實力巡查地方自臻嚴密若再添派京員協辦團練恐互相推諉轉致疏懈著步軍統領衙門順天府五城仍遵前旨認真稽察彈壓務使

京城內外一律肅清並著曉諭商民人等各安生業儻有形迹可疑之人卽行呈報查拏懲辦以戢奸宄而靖地方○諭軍機大臣等前因正定情形喫緊疊次諭令桂良實力籌防本日據奏賊匪擾及藁城藁城至正定惟恃滹沱河阻隔前經疊諭該督飭屬收集船隻以防偷渡茲復據孫瑞珍許乃普等奏亦以急收滹沱並沙河新河船隻爲要著該督嚴飭該地方文武員弁趕緊將沿河船隻概行撤收其餘小河口並飭一律照辦晝夜巡查盤詰奸宄毋任匪黨乘閒偷渡該逆被剿若不敢北渡滹沱勢恐東竄河閒天津等處著隨時與勝保知照調撥各兵併力兜剿至省城重地尤宜嚴加防守勿稍大意見在京旗各營及察哈爾官兵卽日啟程已飭順天府雇備車輛贏頭應用府尹宗元醇前赴良鄉督催起辦著桂良迅派大員攜帶銀兩沿途迎接接濟以利軍行毋稍

延誤將此由六百里加緊諭令知之○諭逆匪已竄至臺城勢甚
剽疾我軍若能趕緊追及何至任其猖獗如此勝保見已由獲鹿
馳至正定扼賊北竄之路訥爾經額見已革職其統帶官兵並副
都統維祿總兵經文岱所帶官兵及在後盛京官兵一千餘名均
著西凌阿酌量調遣飛速緊躡賊蹤痛加剿洗毋得稍有延緩並
隨時知照勝保桂良務使聲勢聯絡以期四面兜圍托明阿明慶
等追賊見抵何處未據奏報並著飛催前進儻賊匪被我兵前後
夾擊欲圖東竄卽著相機截擊該都統等追賊業已落後若再不
兼程前進但事尾追自問當得何罪懷之將此由六百里加緊諭
令知之○諭前因勝保軍餉孔急諭令郭夢齡速飭糧臺妥爲供
給見在逆匪竄入直境各路大兵雲集不難指日蕩平惟部庫旣
形支絀而直隸藩庫亦無款可籌著該署撫查明無論何款速撥

銀三四十萬兩解交直隸藩庫以資軍餉其應行解部之款仍遵前旨派員迅速解京不得彼此牽混將此由六百里加緊諭令知之○命惠親王總理巡防事宜○庚戌諭內閣已革大學士直隸總督訥爾經額前奉旨督兵馳赴河南於懷慶解圍賊匪西竄後疊經諭令嚴防直隸與山西毗連各路要隘應如何周密布置乃於臨洺關遇賊竄出山口卽退守廣平毫無籌策見在逆匪紛竄畿疆勝保已由獲鹿繞至正定一帶而該革督本日奏報仍在廣平株守畿輔重地較之他省更關緊要該革督統轄全省貽誤事機厥咎尤重訥爾經額著卽拏問由桂良派員押解來京交刑部按律治罪○諭理藩院尙書恩華經朕特派帶兵剿賊並令幫辦軍務自應奮勇出力乃自懷慶解圍而後逆匪潰竄該尙書帶兵尾追並未與賊一遇經欽差大臣勝保屢次咨催仍復任意遷延

孤恩溺職大負委任恩華著卽革職拏問由勝保派員押解來京
交刑部會同宗人府審訊按律治罪恩華所帶官兵卽交勝保統
帶飛催前進如有不遵調遣者卽著以軍法從事○諭兩翼前鋒
統領八旗護軍統領向係輪流一人在景運門外值宿著添派一
員每日輪流在隆宗門外值宿並著六班值宿之王公文武大臣
等一體認真稽查以昭嚴肅○諭軍機大臣等勝保奏督兵馳抵
正定境內審度賊勢兇截追剿等語該大臣甫出獲鹿山口該逆
已聞風東竄勢甚剽疾如不犯保定卽恐由趙北口竄入河間天
津等處見在察哈爾官兵及京營官兵雖於初八日陸續啟程猶
恐緩不濟急該大臣總宜帶兵星速繞出賊前迎頭截擊總以保
衛畿疆爲要西凌阿維祿經文岱等見由臨洺一路追剿前來卽
著飛催應於何路截剿相機調度慶祺所帶盛京兵二千名由水

路計已行抵保定並著酌量調撥恩華業經革職拏問其所帶馬步官兵卽著勝保嚴催統帶各員迅速前進儻仍遲延觀望卽著指名參奏懲辦將此由六百里加緊諭令知之○諭桂良奏賊匪竄至定州嚴守保定一摺保定爲畿輔屏障最關緊要該督務卽督率文武員弁實力巡防認真堵禦斷不可令該逆竄越勝保若能繞至賊前自可會同進剿其河閒一路亦須防其竄入不可疏忽易州一帶據德春奏防守浮圖峪係屬後路此時賊從前路奔竄著該督酌量緩急有可撥兵協濟之處卽著分撥援應京兵雖已陸續啟行仍恐緩不濟急該督仍當統籌全局相機布置賊情剽疾儻越過保定直犯河閒或至天津俱當隨時調度一面知照勝保飛飭帶兵大員攔截逆蹤北竄將此由六百里加緊諭令知之○諭前曾諭令恆春暫駐正定督率文武據守滹沱遏賊北竄

茲據奏稱行抵平定州與勝保相遇並接受巡撫鹽政關防等語該撫既已馳抵山西地方著毋庸折回正定見在賊已竄至定州逼近畿輔勢甚剽疾昨已有旨諭令郭夢齡速撥軍餉三四十萬兩解赴勝保軍營此時由晉入都道路無有梗塞該撫務須確實偵探何處可以行走派委委員迅速解赴大營備用毋誤事機至部庫需項緊急並著督同藩司郭夢齡遵照前旨盡心籌款迅速解部晉省防守固不可疏失尤當以畿輔爲重該撫甫經出京想近日情形亦所深悉無待朕諄諄誥誡也將此由六百里加緊諭令知之○諭連日據桂良等奏賊匪北竄擾及定州一帶見當防剿喫緊之際著毓書再行挑撥熱河官兵數百名並熱河哨內駐紮東三盟官兵三千名飭令總管那敷德卽日管帶啟程來京所有前調哨內牧放之錫林郭勒馬三千匹卽速催趕前來再古北

口提標兵丁如有可以調撥之處卽著該都統飭知該營員挑選精銳數百名派委得力將弁帶領來京以備調用毋稍延緩將此由六百里加緊諭令知之○諭逆匪被剿奔竄擾及直境畿疆重地自宜密爲布置先事豫防著倫恭查明密雲官兵內見在存營若干酌派精銳兵丁數百名迅委得力將弁管帶來京以備調遣將此由五百里加緊諭令知之○諭奕經奏徐州緊要請旨暫畱或另派大員接替等語徐州爲南北適中之地見在安設各路糧臺又值豐工漫口恐土匪乘機竊發該侍郎所奏自係實在情形奕經著仍駐紮徐州以資彈壓逆匪見踞安慶揚城賊匪又窮蹙思竄如該逆欲圖北竄務當扼要迎擊不可稍涉大意仍隨時察看皖省情形與李嘉端慧成等聲息相通互爲援應軍情變幻靡常亦不可拘泥株守其各屬捻匪務宜查拏淨盡以免勾結被災

饑民亦著隨時安插勿令流離失所將此由六百里諭令知之○
諭據長臻奏逆匪分股竄擾彰衛兩府會籌防禦一摺逆匪由懷
慶竄入山西復由洪洞東竄武安涉縣一帶擾至直境已有旨諭
令勝保等督兵前後夾擊諒可得手彰衛兩府之賊是否卽是此
股抑係另股分竄著該督卽商同陸應穀派員實力勦辦勿畱餘
孽陸應穀於初一日馳赴懷慶著卽督同河北鎮花里雅遜布加
意巡防如有回竄賊匪務須盡數捕拏楚旺鎮與直隸接壤上通
津定下達東昌兗濟一帶恐有土匪乘機竊發並著陸應穀派委
妥員設法彈壓前據李嘉端奏賊匪復擾安慶難保不又圖北竄
皖豫交界地方該撫尤當統籌全局派兵扼要防守萬不可再蹈
前轍致令該匪紛竄將此由六百里諭令知之○命工部員外郎
耆英在巡防處效力○辛亥 上御乾清宮授惠親王奉命大將

軍印御前大臣科爾沁郡王僧格林沁參贊大臣關防先期遣內閣學士載堪奉印奉關防陳於乾清宮案大將軍參贊大臣暨從征各官咸蟒袍補服俟於丹墀東屆時上御龍袍衣服至乾清宮入坐大將軍參贊大臣升自東階從征各官從升大學士裕誠祁寯藻奉印奉關防授大將軍參贊大臣大將軍參贊大臣祇速率從征將士行禮禮成上還養心殿○諭內閣前逆賊滋擾懷慶屢經大軍攻勦潰竄山西復經勝保等飛追截擊該逆計窮東竄復由臨洺北竄正定一帶勝保等見已統領大兵出山繞至賊前該逆不敢抗拒殘喘苟延畿疆近地豈容逆匪肆行前命培成多爾濟那木凱達洪阿等統帶旗營官兵並察哈爾官兵出京進剿必須親近重臣總統諸軍以伸天討惠親王綿愉仁勇忠誠威德克濟著授爲奉命大將軍御前大臣科爾沁郡王僧格林沁公

忠體國謀勇兼資著授爲參贊大臣本日朕御乾清宮親頒大將軍印參贊大臣關防並頒給銳捷刀交惠親王祇領訥庫尼素光刀交僧格林沁祇領卽日統領健銳營外火器營兩翼前鋒營八旗護軍營巡捕五營及察哈爾各官兵並哲里木卓索圖昭烏達東三盟蒙古諸王等勁旅由京前往合剿與欽差大臣勝保等前後夾擊天戈所指自可剋日蕩平王等其勦力同心嚴明賞罰迅奏膚功以副委任○諭恆裕奏擊退賊匪克復縣城並臺北獲勝情形一摺臺灣府屬南北中三路匪徒同時勾結滋事該總兵恆裕督令將備聯絡莊董防剿兼施澎湖遊擊王國忠等所調兵丁與臺灣道徐宗幹所派義勇屯丁水陸合剿斃賊不計其數其中路大股首匪張佑南路大股首匪黃再基等中路股首林義等北路股首王烏番並僞總軍師等共十四名又股首黃義暨夥匪蔡

南等一百八十餘名一併擒獲正法見在山海道路已通全臺漸就肅清著恆裕會同徐宗幹嚴飭地方文武各官與紳民人等搜捕餘匪務獲悉數懲辦毋任一名漏網以安地面而淨根株○勝保奏臣前因逆賊乘夜東竄步隊追趕不及派都統西凌阿魁福等督帶黑龍江馬隊六百餘名西安馬隊一百餘名跟蹤尾追臣卽繞道直趨賊前兜剿初六日行抵正定偵知賊竄臺城不遠當卽派兵前往追襲不期已與西凌阿等所帶馬隊會合該都統等自八月十八日由洪洞奉令追剿沿途追擊斃賊多名因逆賊行走太速不能鈔擊大股及至長子縣一帶與副都統明慶會遇知托明阿腦受槍傷不及追趕將步隊交明慶管帶因會同先行尾追趕至臨沼關與賊接仗生擒十餘名般斃數十名一路州縣隨到隨行逆賊亦未停頓直至欒城整齊各隊連夜進兵於初四日

卯刻前敵追及逆賊大股知其分路欲竄獲鹿正定又因我兵西來復合股東竄臺城適追至距城二十里之宜陽鎮逆賊全股約萬餘人官兵奮勇一齊衝殺將賊隊截斷賊匪敗走官兵追殺三十餘里沿途擊殺長髮賊五六百名半長髮賊五百餘名逃散裹脅百姓二千餘名內有坐轎賊目二名經佐領格棚額侍衛索布多爾札布先後斬獲奪得軍械多件贏馬不計其數並獲二百斤至五百斤大礮二十一尊生擒逆賊百餘名正法追至臺城縣城已失守賊股數千名出城迎撲我兵奮勇擊殺又斃賊數十名賊入城中避匿不出官兵撤隊紮營並經附近村民陸續拏獲奔散餘賊分別正法查逆賊豸突狼奔官兵未能堵禦以致長驅直入擾近畿疆經臣原派西凌阿魁福並會合明慶等追殺業已大獲勝仗頓挫兇鋒惟探知該逆已由臺城搭橋渡至滹沱河北岸盤

踞村莊意圖乘閒東竄我軍步隊僅臣及善祿所帶將及二千名馬隊亦僅西凌阿明慶魁福等所帶千名其由河南撥來之總兵經文岱帶兵於初五日趕到擬卽先行齊隊前進扼其北竄之路相機兜剿並飛催培成多爾濟那木凱由深澤無極一帶進兵達洪阿由定州阜城驛一路進兵飛咨慶祺維祿令其帶兵速赴河間扼截東竄天津之路且作保定犄角之勢西凌阿等卽令由南兜剿不令回竄惟東南一路俟日內續有兵到方能分撥協剿至前調恩華所帶馬隊五百名令其先往無極縣以南扼要駐紮臣步隊兵丁亦卽前進 上諭軍機大臣等逆賊自竄直境所過州縣並未堵禦官兵亦迄未追及以致窮蹙餘匪肆意奔竄經此次痛剿及逃散不下三四千人自必愈形窮蹙惟該逆旣已渡河而北恐南路進剿之兵又成尾追之勢本日特命惠親王爲奉命大

將軍並命僧格林沁爲參贊大將軍統帶健銳營兵五百名外火器營兵五百名兩翼前鋒營八旗護軍營兵二千名巡捕五營兵五百名察哈爾兵一千名卽日出京與該大臣前後夾擊所有前次派出培成等所帶各官兵皆係同時陸續啟程該大臣所稱催令分赴深澤無極及阜城驛等處進剿之處猶恐緩不濟急著卽先將催到之兵扼要布置仍飛咨僧格林沁分撥進剿慶祺所帶之盛京兵已由水路啟程卽可令其前赴河間扼截此時西凌阿等由南兜剿卽可兼防東竄之路該大臣再能迅速北趨已不難兜圍剿滅勿因命將出師稍有延待總期同心勦力迅殄妖氛論功行賞朕惟以剿賊之遲速爲權衡也本日又據桂良奏水路由深州可通豫河直至天津見已移咨慶祺相機進止又滏陽河一帶界連冀州獻縣等處亦連天津爲鹽船聚集之所等語著該大

臣卽酌籌安防其訥爾經額原帶之兵見歸西凌阿管帶能否卽將此項官兵調撥東南一帶卽著酌量辦理將此由六百里加緊諭令知之○河南巡撫陸應穀奏歸德被賊竄擾後各處擒匪乘機肆起派撥兵勇前往剿捕據夏邑縣知縣徐本立稟八月初三日夜間探有大股擒匪二千餘人勢欲撲城該縣隨帶兵勇出隊迎截匪徒恃眾拒敵我兵施放槍礮擊斃二百二十餘名生擒二十餘名餘匪逃散初十日該縣會營帶領兵勇前任兩廣總督徐廣縉赴商邱縣馬牧集等處剿捕行至三官集遇匪千餘迎撲兵勇分隊奮擊該匪開礮拒戰該縣密飭練勇夾攻擊斃擒首一名殺夥匪二百餘名生擒七名訊據獲賊供另有大股擒匪前來乘虛攻城該縣折回添募壯勇並稟徐廣縉派兵接應先令生員彭作元等帶勇分路設伏自督典史周爲芬分帶兵勇馳往三更時

見有匪徒一千三百人蠶擁奔至兵勇分兩路迎擊四面伏兵
齊出合力兜剿該匪力不能支殲斃三百餘名落水淹死不計其
數生擒擒首司罄雲等三名夥黨四十餘名餘匪奔竄又署歸德
府知府王憲稟著名擒首宋清沅等在馬牧集牛王堦等處盤踞
初十日隨同徐廣緒統率兵勇千六百名馳至夏邑縣鄭家集匪
徒千餘列陣拒敵兵勇奮力直前槍礮環施擊斃十餘名該匪潰
竄我兵跟追又斃百餘名生擒擒首李大漢等六名千總張慕松
擒獲擒首姚慶德一名十四日追至劉隄圈擒斬擒匪數十名奪
獲車輛羸馬該匪竄入碭山經該縣兵勇會拏擊斃百餘名生擒
夥匪二百餘名並獲巨擒盧四等二十一名又代理商邱縣知縣
陸成沅署典史陳必受拏獲擒匪田谷禮等六名徐本立先於十
二日帶領兵勇趕至李亢集適有大股擒匪撲來拒敵我兵奮勇

截剿斃匪二十餘名生擒劉恩傳等十餘名並將賊巢焚燬又據探報駱三羣等糾眾在張家花園搶掠十四日周爲芬等帶兵迎剿斃匪二百七十餘名生擒八十餘名並獲總擒首駱三羣等三名兵勇間有受傷臣仍督飭官軍分路進剿務將未獲之匪悉數殲除報聞○添派親王銜定郡王載銓內大臣璧昌辦理巡防事宜續賞出征各旗營官兵銀兩及察哈爾羊隻○王子諭軍機大臣等琦善等奏攻城斃賊並盤獲奸細一摺揚城逆匪數已無多兩月以來疊據該大臣等奏報不過待其絕城而出始圖轟擊並未見併力進攻今揚城克復之信愈無憑準而安徽廬巢一帶危急萬分逆賊以揚城餘黨牽制大兵琦善等頓兵城下久而不克若皖省賊匪肆擾則揚城各路之兵必致腹背受敵更難措手見在北竄之賊並無後援尙且重煩兵力若再聽其擾及皖省全股

北竄該大臣等自問當得何罪揚城餘匪勢極窮蹙著卽迅圖克復一面分派得力員弁帶領兵勇援救安徽毋稍延緩琦善本係江北總統斷不能專顧一隅坐視貽誤也將此由六百里諭令知之○安徽巡撫李嘉端奏逆賊三擾安慶登岸踞城經臣分撥兵勇赴集賢關堵剿並激勵將士嚴守待援探知賊在城中添造刀矛驅婦女老弱出城修築迎江寺圍牆礮臺遣船分往上下游搶掠據呂賢基函稱自六安赴霍山聞安慶之警卽折回舒城至桐城整頓團練以爲官兵聲援其時恆興等所帶兵勇陸續亦到臣又派主事邊葆清帶練勇二百名馳往張熙宇營幫辦乃安慶尙未開仗據含山縣孔繼黃稟稱有賊船數百隻由金陵駛至和州之鐵魚嘴恐其上岸分竄遂各帶勇至和含交界之張公橋堵禦並由署臬司張印塘派辛本梅帶勇接應正在啟程鐵魚嘴之賊

船已竄裕溪至三汊河乃改派辛本梅赴黃落河無爲州一帶會同李登洲由芙蓉嶺分勇協剿又據玉山王正誼函稱初二日已刻賊船六七百隻直上運漕當派黃元吉督勇迎剿擊沈賊船一隻斃賊數十人力戰十二三刻賊復大至不能不退回東關李登洲等在黃落河亦未得手仍回芙蓉嶺辛本梅等尙未趕到賊離東關甚近等情臣惟有督令玉山張印塘等嚴飭文武極力守禦一面飛催各路援兵合力夾擊前聞江西有尾追兵勇迄今未得的音湖北賊船聞亦造成多隻屢經催調亦復杳然江南艇船見亦不知作何布置應再請旨速飭上下游水陸並進毋分畛域全皖幸甚又奏據李登洲稟初二日賊船闖入黃落河當即督勇開放槍礮斃賊三百餘人適以鉛藥用盡且賊數眾多力難抵禦退守芙蓉嶺壯勇死傷二百餘人又李鴻章暨張印塘函稱初三日

有賊船千餘隻擁進東關經玉山王正誼派富惠辛本梅黃元吉各帶兵勇力禦眾寡不敵東關失守臣查賊勢猖獗若入巢湖即可直抵廬郡見已飛調恆興帶兵趕緊折回號召附近團練以爲守禦之計並咨會呂賢基在桐邀集團練扼守南路 上諭江西敗竄餘匪占踞安慶欲圖牽掣金陵大兵前已飭湖廣江西速備船礮下駛援應並諭江忠源跟蹤追剿八月二十八日復有金陵賊船數百隻駛至和州旋入裕溪東關卽行失守是該逆進則窺伺巢廬退可接應安慶賊勢愈張兵力不足覽奏實深焦灼本日諭琦善等速籌應援並催令張亮基崇綸卽將改造船隻速配兵勇隨帶礮械趕赴下游交江忠源管帶以資援應著周天爵遵照前旨迅撥兵勇前往堵剿保護廬巢杜賊北竄之路呂賢基所帶練勇卽可援應廬郡仍須設法阻截安慶賊匪令不得與東關聯

貫常清見經降旨摘去頂帶議處其所帶青州官兵見到和州卽著傳旨該副都統協力攻剿以贖前愆該撫一面嚴督在城文武紳士固守廬州一面知會河南山東豫防賊匪分竄並著周天爵李嘉端督率玉山恆興力籌堵禦萬勿更令舍舟登陸復行北竄將此由六百里加緊諭知周天爵李嘉端並諭呂賢基知之○諭江西下竄賊船占踞安慶前有旨令江忠源跟蹤追剿見在復有賊船數百闖入裕溪情形緊急該臬司行抵江西何處所帶船隻共有若干是否足敷應用著先會同李嘉端設法水陸防剿使該匪不至擾及廬州俟湖北船駛兵勇到時卽進援安慶力保皖疆萬勿再令賊匪北竄將此由六百里加緊諭令知之○添派恭親王奕訢辦理巡防事宜○癸丑諭內閣道光二十九年 皇考曾賜朕銳捷刀 賜恭親王奕訢白虹刀彼時並蒙 恩諭准其佩

用緣此二刀俱係金桃皮鞘非特賞不能用見命恭親王奕訢
署領侍衛內大臣今日伊見面時請旨所有從前特賞之白虹
刀仍准伊佩用金桃皮鞘餘不准用○諭羅繞典吳振棫奏剿除
回匪首犯就擒一摺據奏回匪裹脅數千人盤踞東川之翠雲寺
小雪山經該督等飭令護總兵王國才等帶兵進剿窮搜巢穴擊
殺無算被脅回民紛紛赴營求撫首犯馬二花及餘匪悉就擒獲
並將難回一萬三千餘人派員遞回安插見在東川尋甸地方一
律肅清等語此次剿辦回匪文武員弁著該督等擇其尤爲出力
者酌量保奏候朕施恩至該地方失事文武各官功過尙足相抵
著加恩免其議處無庸再行保奏○諭扎拉芬奏喀爾喀扎薩
克圖汗三音諾顏兩部落盟長汗王貝勒貝子公扎薩克呼圖克
圖等見因軍需未竣呈請情願共捐備銀四千兩馬一千匹懇請

轉行請旨一摺喀爾喀扎薩克圖汗三音諾顏兩部落盟長汗王貝勒貝子公扎薩克呼圖克圖等情願自行捐銀四千兩以充軍需足見悃誠此項所捐銀兩若予賞收朕心深爲不忍惟將所捐馬一千匹賞收與前調取特穆訥馬匹一併交察哈爾都統以備調用俟軍務告竣由理藩院題奏候朕施恩○諭扎拉芬泰等奏扎薩克圖汗銜郡王車林敦多普呈請情願捐輸銀兩以備軍需懇請轉行請旨一摺扎薩克圖汗銜郡王車林敦多普聞逆匪滋事呈請情願捐銀一千兩足見悃誠朕深欣悅但軍營應用銀兩見已妥備足敷應用惟念蒙古生齒日繁自必藉此項銀兩養贍將此曉諭該王伊所捐銀兩毋庸賞收以示朕嘉獎蒙古世僕優加體恤之至意○勝保奏逆眾盤踞臺城臣初六日甫至正定因經文岱維祿俱已趕到當派員弁星夜馳往督隊經文岱等帶領

盛京吉林馬蘭各營兵七百餘名正擬會同西凌阿進攻探得該逆在北關外搭造浮橋意圖北渡經文岱卽率領官兵直奔橐城維時逆匪渡河方半城中尙餘賊二三千我兵雖爲數無多勇氣百倍擁入城中當卽斃賊二百數十名逆眾披靡全向北關外逃竄我兵追至河沿殺賊無數其已過河北之賊見我兵追殺甚急卽將浮橋放火落水死者甚多該逆逃過河北整隊排列用大礮向南岸轟擊又慮官兵乘夜搭橋渡河全股竄往河北村中臣於初七日由正定督兵前進距橐城十餘里探知逆匪在郝莊盤踞臣已渡滹沱督兵前進卽乘夜遁向晉州當令西凌阿等跟蹤速追臣亦督兵繼至適准桂良飛咨賊有分股竄擾定州所屬李青果村之信臣權量輕重本擬卽速東剿因已折而東北趨赴定州該逆知大兵趕到仍合股東竄晉州見在西凌阿等尾追臣復

咨催培成多爾濟那木凱達洪阿等由高陽深澤迎擊不至任其猖獗臣亦卽督兵先行馳赴保定再由高陽一帶督剿前進並飛催蘊秀郝光甲等帶兵馳赴冀州衡水一帶以扼其東南竄逸之路趙北口最關緊要經臣咨催慶祺帶兵前往未知能否趕到恩華業已星夜趕來臣等會合商辦一切總期合力殄滅此賊上諭軍機大臣等本日據勝保奏臺城賊匪見已攻破逃往定州等語著僧格林沁卽催令培成多爾濟那木凱達洪阿等先將已到之兵卽刻管帶前進探明賊蹤與勝保等知會合力夾擊毋令逃竄將此由六百里加緊諭知僧格林沁並諭培成多爾濟那木凱達洪阿知之○諭勝保奏續獲勝仗扼要堵剿一摺臺城賊匪逃向定州該大臣已派西凌阿經文岱等跟蹤緊追該大臣由定州至保定督兵進剿准河開天津一帶甚屬空虛本日已諭令僧格

林沁派令培成多爾濟那木凱達洪阿等將所帶之京兵及察哈爾官兵迅催前進由高陽深澤一路迎擊惟培成等甫經出京道途紆折恐一時未能趕到且諸將中惟達洪阿曾經出兵其餘均未經行陣仍著勝保迅派得力將弁帶兵前往扼要堵截勿稍延待慶祺帶領盛京官兵應於何處截擊遏賊東竄天津之路並著該大臣酌量調度格林沁所帶官兵四千餘名約在涿州一帶布置兼顧保定易州等處其河間天津等處何路緊要卽著撥兵迅速進剿並隨時知照僧格林沁等酌量緩急相機夾擊訥爾經額原帶之兵前已有旨飭令歸西凌阿管帶著勝保迅卽飛調來營以資攻剿毋任逗畱遲誤將此由六百里加緊諭知勝保並諭慶祺知之○以奕湘爲理藩院尙書前禮部尙書○添派左都御史聯順辦理巡防事宜○甲寅諭內閣勝保奏恩華見已趕到可否責

令戴罪自效等語恩華業已革職拏問惟當軍務需人之際既據該大臣奏畱著暫緩來京准其畱於勝保軍營戴罪圖功以觀後效○諭見在各路大兵進剿沿途豫備車馬及馳遞文報均屬刻不容緩乃本日據勝保奏南路未到之兵尙多皆由文報稽延地方官不給車馬以致稽滯並加緊摺奏亦多遲至二三日不等值此軍務喫緊之際各州縣驛站並不先期妥爲豫備實屬玩誤著直隸總督山西巡撫飭查各屬將遲誤兵差稽延文報之各地方官據實嚴參毋稍徇隱○諭怡良許乃釗奏紳民會同官兵收復縣城一摺南匯縣紳民顧祖金等捐貲募勇與官兵會合攻破東南兩門殺斃賊匪二百餘名生擒四名餘匪逃逸當將縣城收復其閩廣匪徒由上海竄至嘉定眞如鎮經參將秦如虎分兵三面環攻殺賊無算辦理尙屬妥善上海匪徒滋擾尙未殲除仍著該

督撫卽飭帶兵各員迅速收復顧祖金等捐貲募勇洵屬急公好義著與在事出力文武員弁一併確查請獎○諭軍機大臣等載容等奏東陵額設旗兵輪流直班擬請加添兵丁守護以昭慎重等語所有五陵宮門外東西班房每處每日值宿著加添官二員兵十名妃園寢著加添官一員兵五名其大紅門等處值宿官兵亦並著一併加添至大紅門外地面敞曠著載容等卽將所挑精壯滿兵二百名分撥駐守並將兼習鳥槍之兵丁飭令該管總管等分日操演以資習練至大紅門等以外駐守之章京著每員每日賞給飯食銀一錢兵丁每名每日著賞給飯食銀六分以示體恤此項銀兩准於永濟庫變價閒款內動支一俟軍務告竣卽將加添各項官兵裁撤以符定制將此諭令知之○諭本日據勝保奏賊由晉州紛竄又據奏賊匪分股竄擾深州等

情逆匪奔突無定若分股滋擾又恐牽掣我師西南兩路固應防
備而東路河間天津一帶尤關緊要綿洵桂齡郝光甲蘊秀等究
竟在何處耽延著卽嚴催星速前進毋得再有延誤慶祺見在行
抵何處應於何路堵截賊匪著勝保酌量調撥勝保等惟有併力
進剿迅殄醜類以副委任見在江西匪船下竄安徽廬州一帶勢
甚危急若不及早殄滅此股賊匪儻皖省匪徒北竄更恐滋蔓難
圖矣保定防守一切事宜卽責成桂良嚴密布置並與僧格林沁
商酌辦理訥爾經額前由天津運赴清化鎮礮位見在是否帶至
軍營著查明酌調應用將此由六百里加緊諭令知之○諭據勝
保奏探聞逆匪欲由晉州竄擾安平祁州蠡縣一帶該大臣已抵
清風鎮卽日由保定一路向南擊剿頃又據勝保奏逆匪分股滋
擾攻陷深州蠡縣告急等語著僧格林沁卽日帶兵馳赴保定以

防逆賊北竄並防備東西兩路以便勝保專力進攻並著飛催培
成多爾濟那木凱達洪阿等卽行管帶見到官兵迅速前進知照
勝保應由何路接應卽行調撥毋稍延誤將此由六百里加緊諭
令知之○安徽巡撫李嘉端奏逆匪竄過東關已革臬司張印塘
督兵進剿受傷退巢縣力難支持賊必直撲郡城若不迅速迎剿
誠恐滋蔓難圖離城四十里之店埠爲巢縣至合肥必由之路且
係南北往來驛站其閒團練人數尙多必得臣督兵親往激勸庶
可力禦賊鋒其水路已派知縣張埴訓導朱宗采前赴沿河一帶
勸諭團練相機堵禦一有警報臣仍督師往剿往來策應若賊竟
水陸同時竄至驟難兼顧臨時或令藩司劉裕鈺於附近河道催
集鄉勇團練使兩地互爲聲援至桐舒毗連安慶扼守尤爲緊要
當飛咨恆興仍駐兵該處防其暗中勾結庶無牽掣之患又奏據

王正誼自含山函稱初三日寅刻賊由黃落河水陸並進當經玉山派令黃元吉由閤鼓山武舉楊國慶由王淮渡兩路進剿而自帶壽春廣東兵五百名嚴守東關其陸路之賊一由閤鼓山腳八里外登岸循山麓撲來黃元吉督勇前進抵禦不期閤鼓山後連龜山之陰突出數股黃元吉等腹背受敵死傷極多一時大潰其水路賊船經玉山督兵極力相持賊勢幾敗而龜山之側忽又有匪船數隻由西渡東我兵久戰疲憊潰去大半止存四百餘人王正誼督勇應援亦不得力遂與玉山退至含山一面飛咨琦善向榮分兵救援廬郡並擬招集餘勇赴柘皋等處相機截擊等情查巢縣西濱巢湖水道固易竄入其城北黃山前後路徑雜出皆可直達臨淮巢城如果失守恐賊將由水陸分竄口隘甚多非數百人所能兼顧請旨飭令慧成迅帶重兵由滁州全椒一路前進併

力堵剿俾臣可專扼廬州一面不至顧此失彼 上諭軍機大臣等見在巢縣情形十分緊要所有水陸各隘口著李嘉端盡力扼守廬州重地尤爲喫緊務當設法保衛該撫出城駐紮店埠據稱團練人數尙多著卽妥爲勸諭激勵以助兵力呂賢基袁甲三趙昀等所辦團練想有成效亦可藉資捍衛總兵玉山剿賊是其專責豈容遇賊輒退著嚴飭相機奮力堵截毋任逆匪北竄將此由六百里加緊諭知李嘉端並諭呂賢基玉山知之○諭見在安慶已被賊踞巢縣合肥一帶再令該匪竄至勢更蔓延不可收拾已諭令李嘉端周天爵等妥籌布置相機剿辦惟兵力甚單不敷分撥情形十分危急著江忠源迅卽馳赴皖省無論水陸總以力遏賊衝杜其北竄爲要都司戴文蘭李輔朝等是否已由九江乘船下駛著一併飛催前進將此由六百里加緊諭令知之○諭前

因賊竄安慶廬巢一帶危急諭令琦善等迅圖克復揚城分兵救援安徽見在安慶已被賊踞儻廬郡更被肆擾則揚州大軍亦恐孤立常清所帶青州官兵八百餘名計已早到和州而該處兵勇較單仍恐未能得力著該大臣等迅速添派弁兵前往安徽會同剿擊若頓兵揚城任賊由皖省北竄該大臣等自問安乎否耶將此由六百里加緊諭令知之○諭前因賊匪占踞安慶竄入裕溪已諭令周天爵派撥兵勇前往堵禦見在廬州情形危急若稍有疏失大股賊匪復將北竄勢更滋蔓難圖皖江爲南北咽喉周天爵懃直勇敢朕所素知此時江北一帶惟該侍郎尙能辦賊當此軍情緊急地方待援甚迫豈不能爲朕分憂耶臧紆青所募壯勇亦可自成一隊用以擊賊見在山西餘匪竄入直隸勝保等統兵截擊不暇南顧該侍郎能保衛皖省杜其北竄之路朕所望也將

此由六百里加緊諭令知之○諭有鳳奏閩省瘠困情形一摺福建同安廈門賊匪見經李廷鈺懷塔布等相機剿辦已可得手王懿德見駐泉州永春大田之匪亦可次第進剿惟各屬兵力較單不敷分撥前調粵兵三千名是否行抵閩省著卽飛催前進並督飭文武員弁迅將該逆林俊黃有使等按名悉獲首逆旣擒餘黨自易解散至於軍餉支絀自係實在情形惟部庫旣無可撥之款而各省藩關各庫羅掘殆盡所有該省應需餉銀仍著咨商浙江巡撫及廣東督撫設法通融以資接濟至以本地之團練捕本地之盜賊最爲切要雖各處人心不齊要在經理得宜自可漸臻實效總之調兵籌餉之難不獨福建爲然全在該督撫等悉心籌畫不可畏難自阻也將此由五百里諭令知之○命綏遠城將軍善祿察哈爾都統西凌阿在欽差大臣勝保軍營幫辦軍務○予山

西列難知府何維墀等祭葬世職○乙卯諭軍機大臣等昨因賊陷深州蠡縣告急降旨令僧格林沁等進駐保定與勝保等合力攻剿本日據僧格林沁奏蠡縣迤北無險可恃所統之兵總宜駐紮涿州不可遠離所見極是僧格林沁統領京兵見駐涿州實爲京師屏障保定後路且足爲該大臣北路聲援朕命將之意實在於此並非令該王等代替該大臣也直隸軍務一切仍責成勝保就見在統領之兵酌量調度以一事權不必疑慮昨又令西凌阿善祿幫辦軍務聲勢愈盛賊膽必寒該逆旣擾晉州復竄深州奔突無定茲據桂良奏深州鄉勇聚集萬餘人將城圍困專望槍礮接濟聞該大臣擬由張登集馳往進剿並令佟鑑帶礮隨往著卽乘此機會迅速前進其晉州賊匪分股是否西凌阿善祿等追剿亦已得手東路河閒一帶必宜嚴防慶祺繞由鄭州馳赴河閒仍

須該大臣派委得力大員協力截擊尤須扼賊東竄天津之路並隨時知照崇恩一體嚴防若餘匪窮蹙竄至山東必須迅速追擊東省兵單皖省情形亦復喫緊想該大臣全局在胸也勝保等統帶之兵見有若干催調未到之兵若干訥爾經額所帶之兵見亦歸勝保調遣統計大營各路官兵共有若干名著卽詳悉奏聞賊匪竄奔剽疾其火藥鉛丸雖沿途搶掠亦豈能如許之多著勝保密查如有奸民暗中售賣必須設法嚴拏斷其接濟且屢次擊敗賊匪遺棄贏馬器械等件充塞道路安知非誘我兵奪拾耽延藉得乘間逃逸種種奸計均須慮及切勿稍存大意將此由六百里加緊諭知勝保並諭西凌阿善祿知之○諭呂賢基奏賊眾擁船千餘隻駛進東關並由閤鼓山旱路分竄我軍退散和州李登洲往黃落河接仗因援兵不至退守芙蓉嶺知縣黃元吉所帶練勇

亦均逃散總兵玉山見勢不能支退赴含山等語玉山以專閫大員帶兵扼守隘口何以任令賊蹤闖入徑行他往著卽革職仍暫畱本任責令戴罪勦賊李登洲黃元吉二員於賊船一至未能力挫兇鋒以致鄉勇四散均屬罪有應得著李嘉端查明參奏皖省兵力尙單他省亦難徵調惟周天爵帶領兵勇可以移緩就急江忠源自九江來援計日當可趕到本省練勇亦可協助官兵該侍郎及趙昀等所辦團練已有成效且人數尙多務卽妥爲勸諭激勵令各該紳士等隨地堵截嚴密扼守總以保衛廬巢遏賊北竄爲要將此由六百里加緊各諭令知之○派左都御史文瑞鑲白旗蒙古副都統烏爾棍泰前往通州帶兵防堵○丙辰勝保奏臣於十一日探得逆匪分擾安平蠡縣及距保定六十里之張登地方又查深州東南兩面大水賊難偷渡北面水小逼近饒陽泥淖

可行西路無水界連安平祁州深澤無極等處恐賊仍由此竄逸
亟須四面兜剿已派善祿由祁州深澤馳赴深州西面擇要堵剿
西凌阿由東鹿赴深州西南面駐紮與善祿作犄角之勢臣由張
登安平直擣而南徑趨深州督率各路兜剿至饒陽一帶已派吉
林黑龍江馬隊三百餘名前往遙作聲勢至慶祺所帶盛京官兵
業已飛催並遵派松玉前往河間與慶祺商辦防剿事宜儻賊勢
尙眾仍有不敷攻剿之處卽當咨商僧格林沁辦理 上諭軍機
大臣等逆匪竄踞深州明知北面大兵雲集乃敢分股北擾安平
蠡縣張登集等處固因東南兩面水大難行亦難保非零星牽綴
分我兵力見在賊眾約有若干何以援及數處勝保旣督兵由省
啟程自可從北面隨剿隨進其善祿西凌阿由西面及西南面進
剿自應如此布置惟東南兩面雖有大水仍不可不嚴爲堵截深

州鄉勇圍賊之事是否確實如果民心齊集加以兵威自必更易得手綿洵桂齡蘊秀郝光甲所帶各兵何以屢催未到著卽查明見抵何處飭令迅速趨行不得又以接咨遲延藉詞推諉訥爾經額所帶之兵並著速行催調以備攻剿惠親王見須畱京調度京城內外一切巡防事宜此次派出官兵均係僧格林沁統帶出京僧格林沁培成多爾濟那木凱達洪阿等所帶官兵俱駐涿州保障京師所有保定省城防守事宜仍著桂良妥爲布置恩華奏帶之文武員弁卽著勝保察看分別去畱將此由六百里加緊各諭令知之○諭陸應穀奏賊匪北竄添兵馳赴彰德截剿一摺逆匪竄入直隸大兵四路兜剿難保不竄回豫境彰衛等處自應加意嚴防該撫旣行抵衛輝添調練勇以助兵力著卽前赴彰德督飭鎮道大員將界連直隸各要隘渡口分撥設防並嚴飭地方文武

不得擅離職守儻有藉詞堵禦先行逃避各員弁卽行嚴參以軍法從事至江西退回逆匪見踞安慶復有金陵賊船數百隻突入東關近逼廬郡皖省防兵單弱甚屬可虞河南歸德一帶土匪前經徐廣縉協同地方文武帶領兵勇剿捕尙爲得力著卽傳旨該革員與總兵柏山相機防剿該撫見駐河北一俟直隸竄擾餘匪剿滅彰衛一帶無煩防堵卽當分兵策應皖省不可稍分畛域致誤事機將此由六百里加緊諭令知之○諭張亮基崇綸奏江西解嚴賊圖竄楚見在辦理情形一摺楚省與江西安徽接壤處所凡水陸要隘悉經派兵防守所辦均屬周妥昨據李嘉端奏稱東關失守廬郡危急已有旨諭該署督等將前奏改造之戰船速行挑選兵勇配齊礮位派員管帶駛往安徽交江忠源以資攻剿賊情詭譎異常聲東擊西是其慣技此時情形深恐江西金陵兩股

逆匪直撲皖省復圖北竄其竄楚之匪雖駛近田鎮仍徘徊不前是欲牽掣楚兵使不能救援安徽已可概見著該署督等遵照前旨速將前項船隻派員帶赴安徽並飛催江忠源迅速赴皖剿辦萬勿稍有遲誤想該署督等定能統籌全局先其所急也將此由六百里加緊諭令知之○予湖北殉難同知邵綸等祭葬世職○丁巳諭內閣前有旨將恩華畱於勝保軍營戴罪圖功以觀後效本日復據僧格林沁奏該革員已行抵涿州可否畱營效力等語恩華著畱於僧格林沁軍營差遣委用戴罪自效○戊午撥內庫銀十萬兩交順天糧臺備軍需○己未諭軍機大臣等桂良奏接准山西咨報賊至平山縣西雄德店地方並有占踞山西五臺縣屬陳家莊之事如實有其事則紫荆關易州一帶自應嚴密設防儻係逆黨播散謠言冀圖大兵西剿則東面防備未免稍空著僧

格林沁迅速確探應如何派撥堵剿之處妥爲籌辦不可墮賊奸計仍著德春就近確切偵探務得實情隨時知照僧格林沁酌量設備昨諭令恆春派兵一千名前赴易州著德春飛咨山西巡撫催令前進擇要布置毋稍遲延將此由六百里加緊各諭令知之○諭寄諭欽差大臣勝保直隸總督桂良該逆盤踞深州分股北擾安平蠡縣等處何以遽行竄至平山縣西雄德店地方復有占踞五臺縣陳家莊之事是否晉州賊匪分股西竄抑係各該處土匪竊發地方官急望官兵來援倉卒具報此股逆匪原甚剽疾亦難保非乘虛猝突爲牽綴我師之計勝保見由保定統兵赴深州攻剿善祿西凌阿亦併力迎擊綿洵桂齡郝光甲蘊秀所帶之兵均從西南一路前來何以未與賊遇接仗正定等處地方官何以並無稟報殊不可解偵探最關緊要設有舛錯貽誤事機所關非

細該大臣與該督惟當相機布置應於何路分兵扼截總須嚴飭各路探明兇剿不可墮賊奸計致令我兵疲於奔命見在賊踞深州約有若干其西竄之賊是否卽係晉州分股仍著確切探明隨時馳奏近來各路文報遲延該督務須嚴飭地方官安設驛站馬匹妥速郵遞萬勿疏忽將此由六百里加緊各諭令知之○諭據有鳳王懿德奏剿匪事宜並捐輸團練各情形一摺見在徵調紛繁庫款支絀閩省會匪滋事若不借助於捐輸團練勢必兵餉兩絀更將何從措手該督等既經選派紳士協同委員分別勸諭卽著實力妥辦不得徒以棘手爲詞聽其渙散前據御史陳慶鏞奏保紳士林國華等辦理捐輸團練事宜見在若何設法勸諭卽著迅速辦理至會匪蹤迹詳閱所奏以廈門爲最要同安次之其九龍山及邵州汀州防堵又當俟同安廈門剿辦蒞事之後再行籌

及自係通籌全局著卽照所議次第勦辦不可稍有遷延廣東紅單船係專爲江南協勦之用該撫奏請暫畱十五日克期合勦依限收復自係爲勦辦得手起見惟自該省發報之日至今已越兩旬此項船隻必已及早開行著將何處開出閩洋之處據實奏聞不准再請截畱致誤江南軍務將此由六百里諭令知之○命御史陳慶鏞回福建本籍辦理團練事宜○撥廣東銀二十萬兩解赴福建備軍需○庚申諭內閣惠親王等奏請頒行銀錢鈔法一摺據稱銀票以便出納錢鈔以利流通請令京師及各直省均由戶部頒行銀票錢鈔任聽民間日用行使並完納地丁錢糧鹽關稅課及一切交官等項俾文武官員軍民人等咸知銀票卽是實銀錢鈔卽是制錢釐定成數搭放搭收以期上下一律流通等語自來制用常經銀錢並重用楮作幣歷代通行見在銀價昂貴需

用浩繁民間生計維艱必須與時通變使鈔票與銀錢兼權並用以冀裒多益寡日見充盈茲據巡防王大臣大學士軍機大臣戶部合詞籲請實已詢謀僉同著卽照所議由戶部製造錢鈔頒發中外與見行銀票相輔通行其應如何搭收搭放酌定成數以昭限制總期官民兩便出納均平所有一切應辦事宜著戶部詳細酌覈妥議章程具奏○諭軍機大臣等各省地丁徵銀乃國家惟正之供豈容任意拖欠以致帑藏日虧見在賊匪滋擾凡被兵各州縣及被災各區業經疊沛恩施分別蠲緩其未經被兵被災地方自應照舊輸將以充國課乃自加恩豁免積欠之後至今各省復有民欠錢糧卽如山東省昨據戶部奏應徵未解之款尙有一百五六十萬兩之多此外如河南等省及江浙財賦之區未完積欠均復不少推原其故總由不肖州縣任意浮加不恤民瘼以致

催科雖迫裹足不前又或胥吏隱匿侵吞以完作欠州縣官但以所收分數覈計得免處分卽爲了事求其釐奸剔弊爲國爲民者或難其人是以前以每逢恩詔豁免之數動以千萬計而每遇清查無著攤賠之款又以千萬計國家經費有常何堪此層層虛耗日積月累幾成習慣嗣後著各督撫等嚴飭所屬除應行蠲緩之區均已刊刻謄黃徧行曉諭此外各州縣徵收錢糧毋許仍前浮濫並嚴懲吏胥侵漁積弊小民具有天良苛政蠲除自必輸將踴躍當此軍需孔亟惟賴各省完善之區所納錢糧以資供億若地方官仍前玩泄不思潔已奉公斂怨於民致虧正賦著該督撫卽行從嚴參辦並著將見在徵收積欠及上下忙如何實力督徵積有成數隨時奏明一面咨部備撥毋稍延誤將此各諭令知之○諭向榮奏通籌水陸攻剿全局一摺覽奏俱係懸擬布置情形於實在

打仗攻克事宜尚未確有把握金陵鎮江被賊占踞半年有餘雖疊次勦辦獲有勝仗而該逆負隅如故老師糜餉朕心焦慮時深見在賊匪由山西竄入直隸經勝保悉力窮追正在喫緊之際斷難分兵南向至朕特命大將軍惠親王參贊大臣僧格林沁總統重兵保衛畿疆並非令其遠行攻勦前因安徽賊踞安慶進逼廬州屢飭江忠源趕緊赴援須俟皖省勦辦就緒方能移兵協勦此時江南軍務該大臣責無旁貸惟有設法肅清江面斷賊接濟尤爲急務前命廣東督撫雇備挖罟船百隻快蟹船數十隻駛赴江南並令購備夷礮解至武昌配船運往會合夾擊復經張亮基奏買船改造戰艦兼備中船小船共四百隻駛往下游此項船隻曾有旨諭令先儘所有交江忠源飛催赴皖協勦但爲數較多其續行改造成就者該大臣亦可咨調應用其紅單船隻該大臣亦可

飛札迎提與鎮江艇船並新鑄大礮卽分布江路斷賊往來接應
與陸路兵勇夾擊計上海土匪指日埽除想許乃釗於事竣之後
仍可進剿沿江逆匪督率虎嵩林等先復鎮城則金陵巨憝援絕
勢孤可以剋期授首該大臣當速籌克復兩城毋再因循株守徒
糜餉需將此由六百里諭知向榮並傳諭彭玉雯知之○勝保奏
查該逆大股竄踞深州定州餘匪歸併深州經臣等督兵分路前
進該逆奔回深州城內臣先經知照西凌阿善祿加意嚴防並令
維祿經文岱暫守西路以杜回竄十四日未刻該逆聞臣兵將到
恐受圍困全股舍命衝突復圖北竄西凌阿明慶魁福帶領馬隊
迎擊鏖戰兩時之久善祿由西北帶領馬步隊橫衝而來西凌阿
復奮力直衝前進臣馬步前隊亦已趕到三面夾擊該逆抵敵不
住回馬敗走我兵乘勢追殺十餘里賊匪盡匿城中不出時已申

刻我兵因未到齊不敢窮追撤隊回營共計斃賊六七百名臣是日在深州正北距城十五里之西午村紮營西凌阿紮營西北善祿紮營正西其西南一面令維祿經文岱紮營恐其兵力尙單是以分撥馬隊三百餘人前往協剿俟兵力稍集再當添撥其南路有水阻隔東路饒陽有團集鄉勇萬餘人堵禦武強尙有小路可通河間者數處將臣所帶固原步隊撥往並派巴揚阿帶領馬隊前往扼截查探賊情急欲奔竄東北兩路臣兵未到齊不能合圍惟有將馬步各隊分布各要路以防竄逸見在臣所帶已到之兵天津正定固原通永宣化及善祿所帶陝甘各營兵丁共二千五百餘名恩華步隊七百餘名馬隊九百餘名西凌阿等所帶馬隊一千一百餘名維祿經文岱所帶官兵七百餘名統共已到馬步各隊官兵六千餘名及臣所帶練勇五百餘名其蘊秀所帶直隸

及盛京官兵綿洵桂齡所帶陝甘官兵已過正定日內可到郝光
甲董占元所帶官兵俱無到營信息所調後隊兵丁八百名由雙
成德坤統帶計日可到正定托明阿所帶綏遠城土默特官兵落
後未隨明慶前來臣業已催提速進見在恆春屢次請撥擬卽催
令前往由獲鹿赴山西聽候調撥至河閒一帶有慶祺管帶之兵
指日可到臣已咨令相機前進扼要防勦儻賴天威得以悉數
殲除以靖畿輔是臣與在事諸臣私衷竊幸者也又奏賊於十七
日丑刻撲出約計二三千人橫分三股直撲大營先經臣密派馬
步隊分路埋伏以防賊至該匪果乘月色前來勢甚兇猛經派出
吉林黑龍江西安馬隊鈔殺斃賊多名賊竟不退臣親自出營指
麾步隊分投轟擊並經佟鑑督率礮營兵丁施放大礮賊始披靡
經馬步隊追趕斃賊約一二百人生擒數名正法伏思逆賊當此

困處之時進攻正易得手各路未到官兵已差弁催提專待綿洵
桂齡蘊秀等官兵到來分撥東西兩路使賊無處可以分竄以便
由北而南三面齊剿冀殄妖氛以慰 聖廑 上諭逆賊困踞深
州糧藥俱盡正可乘此聚而殲旃該大臣見由北面進剿西凌阿
善祿等扼其迤西一帶巴揚阿分扼武強等處小路係在該州迤
東惟正南一面細閱所奏竟似恃大水爲險固因催兵未齊一時
不能分撥扼守然逆賊舍命衝撲焉知不窺我北路兵多又圖南
竄該大臣仍當密探嚴防或豫爲設伏或多設疑兵使之無隙可
乘方臻完備綿洵桂齡蘊秀所帶之兵計期當可趕到郝光甲之
兵並明慶所帶綏遠城土默特落後之兵均著飛催前進若令全
數到齊儘可分扼南面此股逆賊卽責成勝保西凌阿善祿等迅
速圍剿一切布置切勿延緩將此由六百里加緊諭令知之○辛

酉諭內閣安徽巡撫李嘉端自到任以來毫無布置致逆匪竄踞安徽無爲州巢縣等處均被蹂躪實屬調度乖方有負委任李嘉端著卽革職○諭軍機大臣等前因逆匪占踞東關勢將直撲廬州諭令江忠源馳赴皖省力遏賊衝並諭周天爵督兵會剿本日據周天爵奏赴潁之日僅帶兵二百名奕經帶兵一千駐守徐州兼護宿遷糧臺若揚城賊匪潰圍而出徐宿又當賊衝所領兵千餘名實難分撥等語朕因李嘉端到任以來毫無布置已將該員革職並授江忠源爲安徽巡撫馳驛前赴新任矣見在廬州情形萬分緊急江忠源由江西追賊諒已行抵皖境接奉此旨後卽探明賊蹤所向相機剿辦賊踞安慶築城窵濠復分擾巢縣等處欲撲廬州難保非意圖北竄該撫屢次剿賊著績深悉賊匪情形畧以封疆責無旁貸務當統籌全局迅殄妖氛毋負委任又據周天

爵奏賊船先至運漕鎮將積糧十六萬石插旗封住不許居民輕動該知州林蘭亦卽不敢運動稟明撫臣及大夥再至將糧米全行運往江甯如果屬實尙復成何事體著江忠源查明迅速具奏都司戴文蘭李輔朝先已抵皖仍著飛催前進毋誤事機又據周天爵奏署亳州知州童和豐少年紈袴行止有虧且玩視軍務民瘼經周天爵札飭延不稟覆以致各匪大股均竄亳州等語業經降旨將該員革職著江忠源仍查明該員劣蹟據實參奏原摺片摘鈔發給閱看將此由六百里加緊諭令知之○諭據周天爵奏遵籌防禦皖省並徐宿布置情形一摺潁州一帶土匪猖獗該侍郎督帶兵勇分投剿捕自當漸次廓清惟因徐宿中路緊要與奕經分防揚城竄匪兵力難以分撥而賊匪見竄巢縣窺伺廬郡情形亦甚緊要若廬郡稍有疏失賊勢益熾該侍郎應如何派撥兵

勇應援仍須移緩就急妥籌保衛之策以慰朕念將此由六百里

諭令知之○以江忠源爲安徽巡撫

由湖北按察使遷

未到任前以安徽

布政使劉裕鈺暫署○壬戌諭內閣前疊降諭旨令各直省辦理團練該督撫等諒已督飭所屬各就地方情形妥籌辦理朕聞江南附近金陵各村社及揚州迤東各屬均能練勇自衛江西興安縣壯勇亦能將竄擾賊匪盡數殲斃可見辦理認真自有實效昨據勝保奏稱饒陽鄉勇集有萬人復據巡防王大臣等訪聞該縣督辦甚屬認真似此實力奉行自可爲民禦災捍患著順天府尹直隸總督嚴飭所屬各州縣迅將團練事宜妥速籌辦並著派委大員覈實查勘如果辦理周密輿論允洽卽著據實保奏候朕施恩若因循藐玩或致滋生弊端並著嚴參懲辦至近畿一帶各村鎮距城遙遠難保無土匪竊發奸細潛蹤著卽飭令地方官出

示曉諭如遇有本地匪徒及外來賊夥乘閒搶掠者准該紳民人等格殺勿論有能擒殺賊目及長髮賊黨者均著報明地方官詳請優加獎勵以昭激勸○諭自粵匪竄擾以來地方文武官員或守城殉節或臨陣捐軀及紳士人等志切同仇盡忠效死者業經立沛恩施交部分別議卹並將被害較烈各員命於各該處建立專祠以昭忠節該官紳等忠義之氣允堪振起懦頑寢卹之典仍宜特從優厚著該部詳細查明已經給與卹典者再行分別酌議加贈予諡或入祀昭忠祠其家屬殉難者應如何優卹之處一併酌覈具奏至未經奏報各員著各該省督撫迅卽飭查被害情節奏請獎卹勿稍疏漏用示朕勵節勸忠之至意○諭軍機大臣等見在逆匪困踞深州糧藥將盡正可乘此機會一鼓殲除但恐勝保軍營兵力尙單不能四面兜圍儻致潰圍而出又須費手此股

賊匪一日不滅則涿州大兵一日不能撤防朕與惠親王等商酌仍須添派精兵速往助剿著僧格林沁於所帶兵內迅卽派撥京營官兵二千名察哈爾馬隊一千名剋日派委大員管帶前赴勝保軍營聽候調遣並據惠親王等奏酌撥哲里木盟馬隊一千名熱河兵五百名古北口兵四百名派令速赴涿州以資防剿僧格林沁接奉此旨著卽遵照辦理無稍遲延將此由六百里加緊諭令知之○諭寄諭欽差大臣勝保昨據該大臣奏軍營兵力尙單不能四面兜圍東南一帶甚覺空虛本日已諭令僧格林沁派撥京營官兵二千名察哈爾馬隊一千名迅速前赴涿州軍營聽候調撥此項官兵三兩日內卽可趕到著卽擇要布置乘機圍攻痛加剿洗萬不可任賊分竄張集馨由廟工帶兵折回亦諭令在涿州以南督率團練彈壓撫綏此時郝光甲及明慶蘊秀等所帶之

兵諒可趕到再加以添派三千勁旅兵力不爲不厚該大臣務當乘此機會與西凌阿善祿等迅圖圍剿一鼓蕩平毋稍延緩將此由六百里加緊諭令知之○諭張集馨奏遵旨回省協同辦理防剿一摺逆匪竄入深州經勝保等督兵圍剿僧格林沁駐紮涿州策應本日復諭令添派精兵迅赴深州協剿矣張集馨帶兵五百名練勇一千五百名由廟工馳回正可併力夾擊著卽馳抵深州迤南一帶扼要嚴密堵截毋任匪黨偷竄昨據勝保奏深州饒陽縣圍集鄉勇萬餘人堪資堵禦可見地方百姓志切同仇洵足補兵力所不逮並著該藩司於沿途經過各處剴切曉諭實力團練俾皆奮勇殺賊盡殲醜類以靖畿疆將此由六百里諭令知之○諭自逆匪竄踞金陵已逾半載向榮統帶大兵雖屢挫賊鋒未能剋期收復朕宵旰焦勞無時或釋因念向榮帶兵以來將弁中奮

勇打仗者頗不乏人卽如湖北紅山之役一日破賊十三壘到金陵後連破賊壘七橋寶一仗尤爲出力在該大臣以賊匪未平金陵未復不敢遽行保奏然從征將弁日久勤勞若不量加獎敘何以激勵戎行該大臣前保之副將德安瑞格明安泰均經朕簡放總兵此外軍營各員疊次打仗殺賊尤爲出力者著向榮許乃釗秉公酌覈保奏候朕施恩總期無濫無遺以作士氣此旨著宣示軍營俾咸知感奮仍著該大臣等激勵將弁迅圖克復埽穴擒渠以副朕望將此由六百里諭令知之○諭有鳳奏縣城失守賊勢猖獗請添兵撥餉一摺福建賊匪攻陷仙遊縣城興化去仙遊數十里且逼近省垣土匪四處勾結尤宜嚴密設防該署督已飛咨提督炳文飭令總兵鍾寶三帶兵趕赴興化一帶實力攻剿並派文武各員分防江口及永福縣等處地方復經王懿德由泉州派

令署遊擊耿元興等帶兵迎勦合力圍攻當可不至蔓延江西賊
匪已順流東竄所有防堵該省之兵亦可分別調回應用見在征
調紛繁經費支絀該署督等亦所深悉前次樟州府及沙縣等城
被匪攻陷該處紳民激於公忿旋即收復可見士民忠義守禦堪
資爲今之計仍當揀派賢員勸諭團練保衛地方協助兵力至於
需用餉銀著仍遵前旨卽就本省地方酌量情形妥爲籌畫或勸
諭捐輸或試行鈔票搭放大錢惟在經理得人自可試行有效該
署督等諒能統籌全局仰體朕意也將此由六百里諭令知之○
添派戶部尙書孫瑞珍刑部侍郎羅惇衍辦理巡防事宜○命唐
樹義以二品頂帶爲湖北按察使前湖北布政使○調廣東兵一千五百
名赴福建勦賊○撥廣東司庫銀十萬兩解往福建備軍需○癸
亥諭內閣太僕寺卿王茂蔭奏參已革廬州府知府胡元煒貪污

狼藉收蠹役徐淮爲門生倚勢擾害經周天爵奏參革審李嘉端輒將該員仍畱署任署懷遠縣知縣楊昌拔貪鄙婪贓遇賊潛逃並任聽縣差王成等肆行搶掠李嘉端雖將該員撤任仍復委用等語似此貪劣之員若不嚴行懲辦何以飭吏治而服民心著劉裕鈐卽將該員等劣款逐一確查從嚴參辦並提同徐淮王成等嚴審確情按律懲治至合肥縣辦理團練之廩生唐會衢翰林院庶吉士黃先瑜監生郭有訓廩生吳毓芬監生姚恩祺舉人周沛霖趙鳳舉副貢生司璵廩生龔永孚文生蒯德模李鶴章所辦團勇均有成效著該署撫卽傳諭該紳士等加以獎勵令其實力董率保衛鄉閭並查明各屬紳士捐貲出力及殺賊立功者卽行奏請鼓勵候朕施恩○張亮基崇綸奏逆賊於八月三十日辰刻乘順風直撲田家鎮防所陸路賊匪由彭塘分撲岸上營盤道員徐

皇上張汝瀛總兵楊昌泗督飭水路兵勇分投抵拒賊船沿岸行
襲謀呼索戰我水陸各營兵勇嚴陣以待賊船駛進礮丸密如雨
下我兵恃有牆柵遮蔽毫無懼怯度我礮子可及從容施放擊沈
賊船四隻賊匪落水無數其岸上撲營之賊距營百餘丈我兵越
濠開槍轟斃賊匪十名賊勢不支卽行退走我陸路兵勇乘勝壓
下賊匪紛紛敗退本月初一日黎明遙見賊船無數上駛開礮猛
撲該道鎮等嚴飭岸上各營準備並添兵接應旋據探報賊分三
路每路約千餘人上岸繞撲田鎮我兵亦分三路迎擊遊擊董玉
龍身先士卒衝入賊隊斃賊數十名總兵楊昌泗親督兵勇前後
夾擊遊擊許連城率兵越濠直前轟擊都司曠輔廷參將駱永忠
亦各帶兵勇分途痛勦立將執旗賊目刺斃賊始敗退各路乘勝
掩殺該道等復調戰船兵勇順風下擊直逼賊船焚毀大船二隻

約斃賊七八十人其由馮家山渡江賊船並有執旗賊目所坐大船亦被燬擊壞餘船一併乘風退去初二日賊船仍收泊距田家鎮十五里之富池口意在從南路襲攻半壁山後登峯遙窺知我陸營水寨布置嚴密旋即退去計連次斃賊精銳三百餘名擊沈溺斃無算斬獲首級十餘顆該逆兇鋒大挫揚言俟東北風緊卽直闖田鎮初三日辰刻該逆從富池口分船數百由湖路直抵興國州臣等前遣都司任大華等帶兵防勦尙未趕到該州爲江西入楚閒道湖汊岐出水路可達通山距大江岸六十餘里賊船由湖汊上犯山僻地方一爲搶掠米糧一欲使我分兵策應得以乘虛衝突田鎮臣張亮基前以田鎮兵力不厚止可就近策應不得分兵遠出致中奸計見在臬司江忠源飭調已革副將張金甲雲南都司戴文蘭守備馬良勳所帶兵勇二千名由瑞昌興國一帶

已至田鎮該臬司亦水陸並進星夜親督兵勇前來會剿臣等又札委知府伍煌帶勇五百名都司周祿帶勇三百餘名會同都司任大華之兵相機夾擊此時田鎮兵力漸厚北岸蘄州廣濟一帶有署臬司唐樹義督帶精壯兵勇扼險以待田家鎮可無後顧之憂南岸興國州一帶有該臬司重兵前來聲勢更壯臣等又調已革同知勞光泰帶省中新造礮船十餘隻前赴田鎮協剿全楚門戶似可無虞上諭軍機大臣等逆船竄撲田鎮官兵三次接仗斃賊甚多防剿尚屬認真所有南北岸分擾餘匪著卽責成唐樹義及徐豐玉張汝瀛等督率各文武員弁帶領兵勇水陸扼要堵剿以期殲除淨盡毋稍疏虞該司道等均能深悉賊情相機堵剿當可得力昨有旨已將江忠源補授安徽巡撫並命唐樹義以二品頂帶補授湖北臬司矣前因賊竄安慶擾及巢縣窺伺廬州若

不及早扼截必致紛紛北竄又成滋蔓之勢屢次飛催江忠源迅赴皖省援應見在該撫行抵何處著張亮基等飛催速帶兵勇馳赴皖省勦辦賊匪萬不可稍有稽延致誤事機都司戴文蘭等所帶兵勇二千名見已行至田鎮並著飭令先行兼程赴皖湖北省新造礮船仍須駛赴下游以助江面攻勦該署督俟吳文鎔抵楚後將見在地方情形詳細告之卽行交卸赴山東新任此次擊賊出力員弁兵勇及傷亡弁兵著卽確查分別奏請獎卹將此由六百里加緊諭令知之○以湖南勦匪出力予縣丞王鑫以同知直隸州升用賞藍翎○甲子諭軍機大臣等據僧格林沁奏派兵馳赴深州一摺本日據勝保奏深州賊匪竄往東南全股逃逸等語著僧格林沁卽飭多爾濟那木凱達洪阿將所帶官兵內先行分派馬隊迅卽直赴趙北口任邱一帶截擊以遏賊北竄之路其天

津以北務關路等處亦著酌派弁兵一律嚴行堵截據恆春奏查明山西五臺並無股匪竄往所有培成帶領兵一千二百五十名卽可飭令撤回以備調撥當此賊匪窮竄果能四面兜圍前後夾擊當不難一鼓殲擒該大臣務飭統兵各員與勝保等合力剿辦萬不可再令他竄至訥爾經額著仍遵前旨解京另片所請畱辦糧臺之處著不准行將此由六百里加緊諭令知之○諭勝保奏獲勝情形並逆匪全股竄逸各等語逆匪被攻緊急連夜向東南竄逸雖據該大臣聲稱較之負隅抗拒更易剿除第兜裹稍不得力或致該逆上竄天津下竄德州勢必餘燼復熾且此次抗拒之騎馬賊尙有數百人並有大礮似尙非十分窮蹙慶祺所帶之兵未可深恃卽所稱由景州一帶截其南竄之兵亦未必竟能得力昨諭僧格林沁撥兵接應令徑赴趙北口任邱等處迎頭截擊毋

庸繞道深州諒可與該大臣前後夾擊深州城內是否尚有餘匪
該處文武作何下落各路未到之兵係何員管帶因何尚未催齊
著分別查明具奏該大臣營中將士前在懷慶屢次打仗極爲出
力嗣復追賊赴晉亦能不避艱險迅速繞出賊前奮勇截剿見雖
逆匪由晉東竄出山尙未剿洗淨盡而將弁兵丁日久勤勞朕心
時深軫念著勝保將懷慶出力人員擇其立功尤著者先行保奏
其餘各將弁兵丁並著存記如能迅將此股賊匪悉數殄滅該大
臣等卽將屢次出力勞績一併詳悉保奏朕必加等獎勵此旨著
宣示軍營使大小官兵愈知奮勉至直隸地方團練有效者如饒
陽等處挑選壯練隨營助剿似亦可資得力並著體察情形酌量
賞戴頂翎以遂其報國之忱山西五臺縣被擾一節已據恆春查
明誤報該大臣等正可全力專注東南以期盡殲醜類早靖畿疆

將此由六百里加緊諭令知之○諭琦善等奏會攻揚城一摺所稱疊獲勝仗並四次擊退瓜州賊船各情形均不過小有斬擒並未力圖攻克卽見將礮臺增高臨城攻擊一節亦不知何日築就方能攻城該大臣等頓兵日久每踰旬日一奏塞責似此老師糜餉罪將安屬見在賊踞安慶窺伺廬州疊經諭令由揚城迅速撥兵往援安徽省爲河南山東門戶關繫北省最爲緊要該大臣豈得諉爲不知且江北諸軍統歸節制設賊蹤復由皖江北竄該大臣又豈得置身事外琦善等止願一隅朕不能不通籌全局慧成旣畱揚城總兵翟騰龍本係遵旨帶兵赴豫剿賊之員著琦善等迅卽飭令該員並原帶官兵二千名星速啟程由閒道赴皖協剿不得率請畱揚致誤事機將此由六百里加緊諭令知之○刑部右侍郎奕經奏臣於本月十五日連接周天爵隨營知縣魏源等

稟稱該侍郎病勢甚重將行營鈴記及勦匪事務委令知府張清
元代辦周天爵聲威素著土匪聞風震懾見在潁屬土匪未除蒙
城亳州交界有匪徒張落刑等糾眾豎旗黨與甚眾行旅斷絕若
知周天爵病重恐其愈聚愈多如該侍郎一時未能就痊而所帶
之山東兵一千名全行調赴潁毫則固鎮僅有遊擊李成虎帶領
壯勇七百餘名設南路有警實屬可慮因思已革兩廣總督徐廣
縉由河南撫臣派令帶兵赴歸德一帶緝匪漸次肅清該處距蒙
毫甚近請飭河南撫臣轉飭徐廣縉就近移兵進勦潁毫土匪無
任蔓延爲患蒙毫一帶界連蕭宿永城各縣臣已面飭徐州鎮總
兵百勝挑選駐徐兵勇千名一聞土匪竄入立即前往兜勦上
諭奕經奏皖省潁州一帶土匪充斥周天爵督率兵勇勦捕尙屬
得力昨因廬郡告急令該侍郎撥兵應援茲聞患病甚劇實深懸

緊該侍郎年齒雖邁精力未衰著奕經傳旨諭令趕緊調理以慰
朕念徐廣縉見經陸應穀派往歸德各屬勦辦捻匪該處亦甚緊
要暫且無庸移兵赴皖如周天爵一時未得速痊著奕經飭令已
革臬司張熙宇馳往勦辦周天爵所帶兵勇並臧紆青所募練勇
均著交張熙宇管帶調遣其蒙亳連界之蕭宿永城各縣業經奕
經飭令總兵百勝選撥兵勇一千名以備攻勦仍應隨時相機應
援勿令賊匪北竄宿遷爲糧臺重地奕經駐紮徐州並著就近加
意防護毋稍疏忽將此由六百里諭令知之○江忠源奏探聞九
江失守賊船多已上竄臣恐湖北緊急飛催張金甲等帶領兵勇
趕赴田家鎮八月二十九日臣與總兵音德布等帶領滇川各兵
暨鎮守勇共一千九百名由陸路馳赴九江以圖克復行抵馬回
嶺探悉賊船攻撲田家鎮當畱戴文蘭李輔朝管帶楚勇千餘名

駐紮九江城外臣與音德布趕赴田家鎮救援行至瑞昌又聞賊匪竄擾興國臣卽繞赴興國賊匪聞臣兵至由富池竄出江口當派知州朱孫詒帶兵赴興國州城安撫難民飛調畱駐九江之楚勇暨湖南鎮軍各營兵赴田家鎮另調貴州兵赴九江駐紮臣等於九月十二日午後行抵田家鎮察看情形北岸紮有木筏排列礮船陸路亦紮營防護南岸一帶地名半壁山懸巖壁立江流湍急因兵力單薄未能紮營賊由池口繞上半壁山沿至徐家山下紮營數座與我兵夾江相持臣當與徐豐玉等商議欲於南岸上游沙村一帶地方添紮營盤另用木筏關截並將北岸營盤移紮扼要之處忽東南風大作賊船千餘隻傍山揚帆直上臣所帶兵勇未能全數渡江隨行僅數百名一切未能部署當與徐豐玉張汝瀛督率兵勇盡力堵禦賊船已駛至徐家山下傍賊營停泊臣

竟夜在木筏上督率兵勇極力轟擊十三日黎明風勢愈勁賊船
仍由南岸揚帆上竄陸路一帶賊眾亦蠡擁而至環撲我兵營盤
經徐豐王張汝瀛督率兵勇抵拒鏖戰多時同時陣亡官兵遂至
大潰臣水陸兼顧來往督戰親隨楚勇二十餘人血戰陣亡僅存
數人勢已萬不可支急收集餘眾馳詣廣濟時署臬司臣唐樹義
帶兵駐紮廣濟急謀會兵赴省救護臣所帶楚勇尙在江南岸與
國一帶江面二十餘里皆賊船分布無從飛渡臣卽日與唐樹義
督帶駐防江北之兵並收集潰敗餘兵會同音德布剋期由聞道
馳赴武昌省垣一面飛檄未到之兵勇由江南岸徑赴省城此次
田家鎮失守臣救援不及咎實難辭仰懇 天恩將臣交部嚴加
議處 上諭該逆自九江竄擾興國徑撲田鎮勢甚猖獗張亮基
崇綸昨奏該處兵力不厚札委知府伍煒都司周祿帶勇前往會

剿且有總兵楊昌泗兵勇分路迎擊何以此次接仗僅有該道等奮死抵拒鏖戰多時江忠源親隨楚勇亦皆血戰陣亡所存無多未見大兵隨後援應見在南岸興國一帶江面二十餘里悉經賊船分布雖候屆初冬東風未必時作難保該逆不由陸路窺伺省垣且江面俱是賊船該署督等所派勞光泰帶去新造之礮船十餘隻能否不致疏失其餘續造船隻收集何處均須豫爲準備江忠源見與唐樹義會同音德布馳赴武昌惟安徽安慶被賊占踞廬州又在危急李嘉端既經罷斥周天爵復值患病該處近接穎毫切須防賊北竄專待江忠源前赴皖撫新任該撫所帶兵勇仍酌量繞道帶往安徽以資剿辦張亮基見未交卸且熟悉楚省軍情卽與崇綸督同唐樹義嚴飭地方文武員弁趕緊設法堵截逆船泝流而上如道士洑蘄州等處均可扼守萬不可令其肆意衝

突南岸陸路有無兵勇堵守亦著迅速布置此時賊踪聚集何處並著迅速查奏將此由六百里加緊各諭令知之○先是署山東巡撫崇恩奏官兵赴防請給予沿途行走口糧到防後按捕土匪請照進征之例給予馬乾駄折等銀下戶部議至是奏前經奏定章程本省防兵給予鹽菜銀折色支發其進征者概給口糧該撫所奏未免漫無限制應仍照前定章程劃清防剿分別支應無許節外生枝得旨著崇恩摺節妥辦不准使屬員任意冒銷將來若有例外之支必將該省大吏屬員家產抵賠仍將經手之員以軍法懲辦○以湖北官軍失利革張亮基崇綸職仍畱任江忠源降四級畱任子陣亡道員徐豐玉張汝瀛祭葬世職○予江南軍營病故正藍旗漢軍副都統開隆阿祭葬世職如陣亡例賞銀五百兩治喪○乙丑諭軍機大臣等據惠親王等奏通籌見在軍情請

將東三盟兵三千交德勒克色楞統帶合兵進擊一摺深州逆匪全股由東南逃竄已經該大臣及西凌阿等分路追截復有旨諭令僧格林沁派多爾濟那木凱達洪阿帶領馬步隊兵三千餘名前往助剿再加以東三盟勁旅三千諒此敗竄餘匪自不難剋期殄滅見在安徽巢廬一帶賊匪意圖北竄昨復據江忠源奏江西賊船自九江竄擾興國官兵失利河南山東與皖省毗連爲畿輔屏障若不將直隸賊匪及早殲除淨盡儻南來股匪竄及豫東南北合股必又直犯京師天下事尙堪設想歟惠親王等籌慮及此與朕意適合著勝保統籌全局務將此股竄匪趕緊殄滅其零星餘匪或著西凌阿善祿一人帶兵與德勒克色楞搜捕勝保即可選帶精銳官兵向南迎擊軍威定可大振勝保竭盡忠勇心力俱瘁朕甚廕於懷德勒克色楞抵營後伊所帶之蒙古兵俱係未經

戰陣必應隨同一兩仗方可獨用諒勝保亦深悉朕之專心倚畀也惟軍情變幻靡常難以懸揣仍著該大臣悉心籌辦無誤事機多爾濟那木凱達洪阿所帶官兵行抵何處著該大臣飛催前進合力夾擊將此由六百里加緊諭令知之○越南國王阮福時遣使奉表謝恩並賀萬壽貢方物○命土默特貝子德勒克色楞統帶東三盟官兵馳赴勝保軍營幫辦軍務○以紳士守城出力永廣河南懷慶學額五名開封許州河內各三名祥符二名湖南長沙府三名長沙善化各二名廣西桂林府三名臨桂二名○丙寅諭內閣前因歸德失守將河南巡撫陸應穀革職畱任乃逆匪渡河北竄由山西復入河南武安涉縣擾及直隸地方陸應穀不能先事豫防咎實難辭著革職卽行來京交巡防王大臣差委○諭李嘉端袁甲三奏穎郡漢回滋事脅從解散首犯尙未全獲請

將知府先行革職勒緝一摺安徽潁州府漢回滋事經李嘉端袁
甲三等督同地方紳士妥爲勸諭各安本業所有前次乘機焚殺
各匪徒經潁上縣知縣程鉦等督率各處團練拏獲多名並將漢
民首犯張吟盤擒獲正法其回民首犯陳長泗肇釁起禍漢回其
忿豈容久稽顯戮乃潁州府知府毛含昱辦理此案先旣未能持
平復於護解該犯漫不經心致令中途脫逃實屬庸懦無能毛含
昱著卽革職仍畱於該地方勒限協緝務獲究辦至各處漢回其
處相安已久孰非朝廷赤子嗣後該地方官等於漢回交涉事件
務須一視同仁秉公辦理以昭平允而息訟爭儻有意存偏袒致
啟釁端該上司卽嚴行參奏毋稍徇隱○諭軍機大臣等寄諭參
贊大臣僧格林沁據勝保奏馳抵河閒知賊匪見在獻縣卽日督
兵向南直擣仍催多爾濟那木凱達洪阿等帶兵前進等語覓在

勝保由河閒向南迎擊必須厚集兵力方能痛加剷洗著該大臣速卽催令多爾濟那木凱達洪阿等卽日帶兵馳往河閒一帶與勝保合爲一軍併力圍攻此股匪徒必須趁此喘息未定悉數殲除萬不可稍有遷延今早廷寄朕意猶在持重恐官兵落後是時移步換形萬不可拘泥前旨總以越快越好這樣好機會錯過豈不可惜該大臣仍與勝保隨時知照確探賊情相機布置如賊竟往東竄自應酌量移兵防堵勿誤事機將此由六百里加緊諭令知之○諭本日據僧格林沁奏逆匪見竄獻縣一招昨派德勒克色楞幫辦軍務統帶東三盟官兵馳赴勝保軍營此項官兵到營尙需時日而攻剿刻不容緩多爾濟那木凱達洪阿所帶之兵應於何處迎頭截擊著勝保就近調撥務將竄匪剋期殄滅毋稍延誤至東三盟兵陸續趕到並著勝保隨時知照扼要兜剿以淨餘

準將此由六百里加緊諭令知之○諭前由江西下竄賊船半在
安慶巢廬一帶滋擾半由九江竄入湖北興國州一帶河南與皖
楚毗連不可不嚴加防範徐廣縉勦辦歸德等處土匪已有成效
各處剿練正可協助兵力之不足英桂接奉此旨自以嚴防楚皖
賊匪爲要迅卽啟程萬勿稍有遲延並著察看情形何處喫緊卽
馳往駐紮督同總兵柏山及地方文武員弁與團練紳民一體扼
要防堵黃河各處口隘務將渡船設法收集並隨時知照王履謙
長孫寶力巡查毋任賊匪偷渡其河北懷衛一帶卽傳諭余炳燾
會同該鎮道等加意嚴防毋稍疏懈將此由六百里諭令知之○
以英桂爲河南巡撫厲恩官爲山東按察使由充沂曹
濟道遷○子直隸
陣亡協領三福祭葬世職○丁卯諭內閣賈禎翁心存朱鳳標奏
遵籌城守章程並保舉總辦人員等語京師爲商民輻輳之區五

方雜處清查保甲訪緝奸宄尤宜實力舉行著卽派光祿寺卿宋
晉士僕寺卿王茂蔭並新授福建興泉永道何桂珍會同五城御
史體察情形有無窒礙之處酌覈具奏總以法簡易行不至擾累
爲要○戊辰諭內閣舒興阿奏巡撫膠執己見不肯撥兵協濟等
語督撫共事一方遇有緩急自當通籌全局安速辦理該撫張祥
河於該督舒興阿咨調防兵帶領出省卽因徵調過多未便遽行
撤派亦應與該督和衷商榷乃竟以憤激之語敘入公文殊屬非
是張祥河著交部議處○諭自粵匪肆擾以來曾疊次諭令各直
省地方官勸諭紳民舉行團練並頒給堅壁清野議疏及鄉守輯
要俾資效法如各地方官果能實力奉行何至任賊到處竄擾卽
如近畿一帶聞饒陽縣鄉勇萬餘人頗爲奮勇天津團練亦甚整
齊在小民自衛身家固無不踴躍從事亦賴親民之官倡率有方

始收成效著各直省督撫再行嚴飭各該地方官於團練事宜務宜盡心勸諭實力講求其辦有成效之員卽著據實保奏至各紳民中有捐貲練勇保衛地方實在出力者並著統兵大員及各督撫隨時保奏候朕施恩以昭激勸○諭軍機大臣等僧格林沁奏催兵前進並移營固安一招均著照所議辦理仍與勝保隨時知照以便相機防剿至需用馬駝及多倫諾爾購備馬匹均已分別諭催惟自口外解京恐需時日該大臣此次移營自涿州至固安道路較近不論民夫車輛均可於糧臺通融協濟切不可專候此項馬駝致有遲誤將此由六百里加緊諭令知之○諭舒興阿奏添調防兵赴直迎剿一招逆匪由晉入直經勝保兼程迎擊該逆窮蹙東竄獻縣交河一帶勝保見抵河間向南迎剿僧格林沁復添派京兵隨營前進各路大兵均逼近賊蹤若能盡數殲除卽可

肅清畿輔若餘匪東南奔竄則山東河南皆當其衝見在江西竄出賊匪占踞安慶廬州情形危急且湖北復有賊船上竄擾及蘄州其勢亦甚猖獗該二省均與河南接壤巡撫陸應穀業經革職新任巡撫英桂尙未到任大河以南無人調度著該督卽帶兵馳赴楚豫交界要隘督同總兵柏山與徐廣縉所帶兵勇嚴扼楚匪北竄之路並可兼防皖匪竄及豫境其黃河上下游渡口仍嚴飭地方官收集船隻萬不可任賊偷渡見在吳文鎔已抵武昌張亮基自湖北馳赴山東巡撫新任已令其取道河南卽可於沿途相機剿辦分竄之賊就目下情形而論該督援應直隸則少覺迂遲進扼皖楚則其勢較順總以遏賊北竄爲要仍須隨時與直隸統兵大員知照儻有緊急卽行帶兵北上勿誤事機將此由六百里加緊諭令知之○諭前據江忠源奏田鎮失守道員同時陣亡當

有旨令張亮基等設法趕緊堵截茲據吳文鎔奏賊匪擾及蘄州距省甚近咨調援兵一摺該督歷任封圻朕所倚賴見值防剿喫緊之時與崇綸安撫省垣居民勸令協同固守並著台湧迅調荊州滿營官兵二千名剋日至省援應與唐樹義帶同廣濟兵勇並江忠源收集潰散之兵先行分撥布置江西兵二千名雖經該督咨調恐一時不能趕到仍著就本省情形酌量遠近於他鎮協營飛札調遣並咨調湖南兵勇船隻自上游駛至漢江與張亮基購造各船會集迎剿如探明賊匪尚在蘄州卽於道士洑西塞山至黃石港一路險窄江面扼要堵截黃州爲省城屏蔽不可令該匪竄入尤不可株守省城不爲迎頭截擊之計該逆旣踞安慶復窺廬州恐其仍圖北竄其竄擾湖北之賊如由蘄水麻城延入光山汝陽等處亦屬可慮張亮基交卸後自己卽赴調任惟由安徽江

蘇一路行走計惟徐州有奕經帶兵尚可左右策應而豫省南路空虛捻匪出沒無定深防竄楚之匪與之勾結張亮基卽由豫入東計程亦不甚紆折且徐廣縉見在歸德一帶辦理團練舒興阿又自閩鄉沿河而東確探賊蹤會剿張亮基抵豫時設賊匪有北竄消息可就近與舒興阿徐廣縉等妥籌剿辦至皖省情形危急周天爵病劇未能兼顧江忠源亦不能不迅赴新任兼可於沿途帶兵出奇橫截無論江面陸路能將楚皖之賊隔斷則兩處剿堵均易得手所有楚北剿賊事宜卽著吳文鎔崇綸會同台湧竭力籌辦並可與駱秉章曾國藩迅速咨商接濟兵勇餉需將此由六百里加緊諭令知之○廣西巡撫勞崇光奏查逆匪先以桂平縣之金田平南縣之花洲爲巢穴其夥黨由鬱林博白前往投入者居多飭委知府張鵬萬馳往會同各該地方文武將該逆等三代

墳墓妥速查辦茲查得逆賊韋政蕭潮濱楊秀青石達開胡以洗等祖父墳墓或在金田馬嶺山甘王嶺村或在平南縣五桐村等處均經前署桂平縣令李孟羣等於道光三十年咸豐元二等年先後挖毀因軍務緊急未及稟報桂平縣境內尚有韋政高祖韋積蒿祖母韋黃氏及楊秀青曾祖母楊鍾氏祖母楊李氏蕭潮濱遠祖及其母蕭盤氏各墳墓又平南縣境內尚有胡以洗曾祖胡輝組祖胡贊運鬱林州有逆匪朱錫崐曾祖朱尙漳祖朱德奇各墳墓均督同地方官逐一挖毀伏思該逆弄兵潢池流毒數省苟非戾氣所鍾何以光天化日之下有此梟獍茲先後所發各逆三代墳墓或碑記尙存或指報切實均屬確鑿可據並將其坐山後脈概行鑿斷上諭軍機大臣等據奏查明各逆墳冢悉行掘毀此等大逆實感戾氣而生必應一律鏟除不畱遺孽著勞崇光嚴

飭各屬確切躡訪有續經查出者卽勘明掘毀毋令倖免將此諭令知之○己巳諭內閣前任漕運總督兵部侍郎銜周天爵由知縣擢任封圻退歸田里朕御極後知其人秉性忠直勇敢有爲特命前赴廣西督辦軍務嗣奉旨來京疊次召對議論均極樸實其心地品行迥超流俗本年特加兵部侍郎銜旋補授安徽巡撫辭職後復督帶兵勇將擒首陸遐齡等擒獲並將餘黨殲除辦事甚屬認真見在皖省土匪未靖方資勦捕遽聞溘逝軫惜殊深周天爵著追贈尚書銜卽照尚書例賜卹並著加恩賜諡文忠無庸俟內閣照例擬請歷任一切處分悉予開復應得卹典該衙門察例具奏伊子候補守備周光碧俟服闋後以都司升用以示朕篤念耆臣逾格褒榮至意○諭軍機大臣等吳文鎔崇綸奏賊氛逼近省垣一摺逆匪由九江逆流而上武昌城內居民逃避一空存城

兵一千餘名不敷分布該督等擬帶兵勇於附城四面分紮雖非
可城正辦亦係因時變通有萬不得已之勢惟逆匪上竄若武昌
不能固守則長江上下盡爲賊踞勦辦愈難措手能否分扼南北
兩岸擇要固守該督等雖勢處萬難亦當力圖堵禦以遏賊衝其
上游省毗連等處尤當扼其北竄之路昨已有旨諭令該督等酌
量本省官兵並荊州滿營官兵及湖南兵勇船隻本日復諭令駱
秉章曾國藩酌派兵勇船礮前往協勦吳文鎔統轄兩省務當權
其緩急酌量調撥與崇綸督率司道等悉心籌畫相機截勦仍督
飭所屬勸諭居民團練俾各安生業互相保衛勿令紛紛遷徙儻
能固結人心即可藉資守禦也將此由六百里加緊諭令知之○
諭武昌兵力單弱昨已有旨令台灣派滿營官兵二千名馳赴省
城並該督咨調江西兵二千名合計兵力尙恐不足勦辦長江上

游武昌最爲扼要若稍有疏虞則全楚震動著駱秉章曾國藩選派兵勇並酌撥船礮派委得力鎮將駛赴下游與吳文鎔等會合剿辦力遏賊衝毋稍延誤將此由六百里加緊諭令知之○諭奕經奏江皖緊要等情一摺見在廬郡情形危急新任安徽巡撫江忠源到任尙需時日徐廣縉雖在歸德一帶剿辦土匪去皖甚近惟湖北蘄州上竄賊匪恐其擾及豫境亦不能不兼籌並防著該侍郎傳諭該革員偵察楚皖賊蹤何處緊要卽帶兵勇赴何路迎剿臧紆青所帶練勇據稱極爲得力卽可飭令該員統帶練勇與署潁州府知府張清元遊擊武全等兵勇分扼要隘剿辦土匪併力遏南來賊匪分竄之路前曾諭令飭已革臬司張熙宇統帶周天爵所帶兵勇是否能兼顧臨淮固鎮一帶地方該侍郎駐紮徐州仍須顧其前路毋誤事機總以通籌全局遏賊北竄爲要將此

由六百里加緊諭令知之○以安徽勦匪出力予江蘇舉人臧紆青以通判補用○以直隸任縣隆平柏鄉欒城臺城被賊竄陷革知州胡允植知縣陳登漢陳暄胡勝典史李鞏練朝楨張祺趙秉熙守備德山把總張錦增外委李承膏趙年泰職均逮問○予直隸殉難同知周憲曾等祭葬世職○庚午諭內閣德勒克多爾濟等奏喀爾喀土謝圖汗車臣汗兩部落汗王等因逆匪勦除未盡情願呈請捐輸銀兩以備軍需轉行請旨一摺土謝圖汗車臣汗兩部落汗王貝勒貝子公札薩克台吉等知賊匪勦除未盡情願呈請公同捐銀一萬兩足見惻忱朕甚欣悅但軍營應用銀兩見已妥備敷用惟念蒙古等生齒日繁自必藉此銀兩以資養贍著德勒克多爾濟等轉行曉諭該汗王等將伊等所捐銀兩毋庸賞收以示朕嘉獎蒙古世僕優加體恤之至意○諭軍機大臣等寄

諭直隸總督桂良賊匪竄擾難保不由東而北窺伺天津本日據該督奏報業已飭令天津鎮道嚴加防堵並著迅飭各地方文武員弁於天津前路水陸要隘加意嚴防運河及各處河路港汊船隻均須收集淨盡去其槩舵以杜賊匪搶渡並隨時知照僧格林沁勝保互爲接應張集馨所帶兵勇此時諒已馳抵省南一帶著卽飭令該司扼要截剿遏賊回竄之路省城及各屬團練務當督飭認真辦理毋稍疏懈前據勝保奏後路官兵業已催赴景州一帶爲南路聲援此項官兵何人管帶見抵何處何以屢催不到並著飛催前進儻查有任意逗留等情卽行從嚴參辦至偵探賊蹤最關緊要前次定州探報賊匪情形不實以致我軍因而紆折此等誑報大誤事機著卽查明該州誑報緣由據實參奏將此由六百里加緊諭令知之○兩江總督怡良奏收復川沙廳城得旨上

海必須迅速克復明歲海運漕糧所關甚大又奏拏獲臨陣脫逃千總施洪彥正法報聞○賞調往直隸軍營東三盟官兵銀五千兩○辛未諭軍機大臣等僧格林沁奏逆匪欲竄青縣等語該逆擾及獻縣之後未據勝保續奏其由交河泊頭鎮上竄滄州復欲竄往青縣該大臣既據慶祺咨報移營武清並飭多爾濟那木凱達洪阿帶兵迎擊尤須探明賊蹤所至迅速往前進剿與勝保合力夾擊總須鈔出賊前在天津前路迎剿若任賊竄至天津再從後路堵禦則賊勢益熾剿辦更難得手慶祺統帶官兵見在進至何處如何設法截擊該大臣仍須與勝保隨時知照調撥毋失事機柴荆關之山西官兵一千名卽著調赴固安其運河西通白溝河與良鄉迤南琉璃河等處已諭令桂良酌量緩急妥籌辦理另片奏調撥官兵前往天津協同防堵並請將續到蒙古官兵暫行

駐紮等語當交惠親王等酌度據奏布置尙屬周妥已議將卓索圖昭烏達兩盟官兵二千名暫紮通州以備調遣將此由六百里加緊諭令知之○諭正在寄諭閒據文謙等奏逆匪竄擾天津接仗獲勝一摺並據稱勝保之兵追賊卽日可到見諭惠親王等添派京營官兵前往應援著僧格林沁迅催奕紀等所帶兵一千名星速進剿並著該大臣趕催多爾濟那木凱達洪阿所帶官兵馳往夾擊天津距京師甚近該處勇多兵少必須厚集兵力與勝保併力剿殺方足以殲除羣醜諒該大臣必能權衡緩急不至貽誤事機也將此由六百里加緊諭令知之○諭寄諭參贊大臣僧格林沁頃復據勝保奏稱賊匪竄過青縣並一路追剿情形如該逆被官兵截擊或竄入淀河天津河間以北務關路等處均應嚴防著該大臣迅速遴派將弁管帶精兵於各要隘實力堵剿並著飛

催慶祺松玉等移兵趙北口以東及淀河一帶安設礮位擇要堵截見在該大臣從何路進剿如何分撥官兵卽著飛速奏聞萬勿遲延將此由六百里加緊諭令知之○諭賊匪竄過青縣顯係分股狂奔賊眾既能分竄豈我兵轉不能分西凌阿善祿係在勝保前路追賊何以轉落勝保之後近畿剿捕何等緊要豈猶似遠省可冀掩飾西凌阿善祿均著先行摘去頂帶拔去花翎以示薄懲若再藉詞遷延必以軍法從事此旨著傳諭軍營如能奮勇立功亦必破格加恩也總之此股賊匪必應趕緊盡數撲滅其務關路等處要隘已照該大臣所請諭知僧格林沁矣抵天津後一有勝仗或續有探悉賊情卽行飛速奏報以慰懸繫將此由六百里加緊諭令勝保知之○諭文瑞等奏請於通州城外築立甌牆並籌辦團練各摺片已諭知順天府並倉場侍郎督飭署通永道擇要

趕辦文瑞烏爾棍泰帶兵領隊是其專責見在駐紮通州南關外營盤是何地名形勢如何其由天津抵通之路其有幾處以何處爲扼要通州迤西除常行大路外有無僻路繞越均須嚴密籌備此係文瑞等應辦之事其修理城池及勸捐等事係守土之責帶隊大臣不必兼轄其事轉致拋荒本職至軍情緩急不同尋常營務事件均應報明奉命大將軍酌辦或事關緊要恐轉報稍涉遲延卽當一面具奏一面呈報亦毋庸親身來京遞摺見據僧格林沁奏報賊匪擄有船隻欲由青縣北竄是東路巡防較他處尤關緊要所稱豎立木架攔阻船隻僅能禁其開行仍恐未能杜賊搶掠且由天津至通州陸路亦無險隘尤不可稍涉大意團練以助兵力原應與官兵聲勢聯絡但係民間自行舉辦不可以兵法相督使其聞而生畏總之地方之事應歸地方官經理軍務防剿機

宜則帶隊大員之責也將此諭令知之○諭文瑞等奏查明通州情形並辦理團練各等語據稱通州城垣坍塌過多若一律估修工程浩大非倉卒所能辦理應如何設立甌牆藉資防守並團練各事宜著順天府倉場侍郎迅飭通永道體察情形督率地方官紳實力趕辦該處文武員弁見多調遣署副將達年標兵不敷應用並著順天府於所屬地面內迅速酌撥兵弁以資守衛將此各諭令知之○諭李嘉端奏賊匪退竄巢縣獲全並請將在事文武分別議處開復各等語逆匪分水陸兩路竄擾巢縣兵勇竭力攔擊賊船已全數由柘皋裕溪退去雖巢縣見未失守而賊匪有不久復來之語東關隘口仍須加意扼守李嘉端業經革職江忠源抵任需時著劉裕鈺添派弁兵督同練勇扼其回竄之路勿任匪蹤再行闖入至李嘉端所請除已革知府胡元煒毋庸開復外其

壽春鎮總兵玉山候補直隸州李登洲已革參將富惠候補知縣黃元吉辛本梅及巢縣知縣邵啟元典史李祖堯外委陶金揚與賊接仗失利情形著劉裕鈐查明據實具奏該革撫所稱縣城未陷邵啟元李祖堯陶金揚功過相抵之處一併查奏劉裕鈐見署巡撫甫經到省於該革員等無所用其回護至合肥縣人金妙有無從逆見在自行投出情節是否可信並著確查辦理將此由六百里加緊諭令知之○予江西殉難知縣謝方潤等祭葬世職○是月給貴州鎮遠松桃等府廳屬被水災民口糧籽種並修屋費